

محمود السعدني

للأعمال المسرحية الكاملة



الجزء الأول

- عزبة بنيوتى
سرمدية من ثلاثة فصول
- بين النهديين
سرمدية من ثلاثة فصول
- النصابين
سرمدية من ثلاثة فصول
- الأوزنس
سرمدية من ثلاثة فصول



الأعمال المسرحية الكاملة

محمود السعدني

الجزء الأول

□ عزيمة بنايوق

مسرحية من ثلاثة فصول



الغلاف والإخراج الفني:
أميمة علي أحمد

عزبة بنايوق

سرمدية من ثلاثة أصول

الفصل الأول

- (فى غرفة مكتب حسنين بيه عضو مجلس النواب والمقاول)
ليس فى الحجرة شىء من اسمها الا مكتب قديم ضخم
فوقه صورة لرجل عجوز فى ملابس بلدية وعدة مقاعد
ومائدة صغيرة ودولاب . للحجرة بابان ، الايمن يودى
الى داخل البيت ، والايسر يودى الى الخارج . يرى
حسنين بيه جالسا خلف المكتب منهمكا فى الكتابة ، وتدخل
زوجته أبرز ما فيها انها تبدو أصغر منه بكثير) .
- الزوجة :** الساعة بقت ٤ دلوقت ، مش تقوم تستريح شوية .
- حسنين :** (بجفاء) وأنا امتى استريحت ، طول عمرى وأنا فى الهم
ده .
- الزوجة :** طيب مش تقوم تاكل لقمة وبعدين ترجع تشتغل تانى .
- حسنين :** وهو الراجل اللى وراه مشغوليات بيجيلو نفس يأكل
حاجه .
- الزوجة :** (تجلس) أنا عارفه شغل ايه ده اللى انت طول النهار
خاوت بيه دماغك .
- حسنين :** (يلقي بالمقلم) العزبة المهيبة ، عزبة بنايوتى اللى كانت
خرابات وعشش وعقارب ، بقت مدينة ترد الروح ، تشرح
القلب .

الزوجة : طيب مش اتبنت وخلص .

حسنيين : أيوه صحيح ، خلاص البلاط والشبابيك والأدوات الصحية ،
انما لسه الخوتة ، وقلبة الدماغ ما خلصتتش ، لحسد
امبارح بس ، المصاريف ٣٥٠ الف جنيه .

الزوجة : وانت ايه اللي كان شبكك فى الخوتة دى ؟

حسنيين : (بغضب) رجعنا للكلام الفارغ ، ايه اللي كان شبكك .
ايه اللي جاب رجلك ، ايه اللي وقعك ، كلام لا يودى ولا
يجيب .

الزوجة : طيب امال بتشكى ليه .

حسنيين : بلاش ياست ، هاتى ابرة وفتلة أخيط بقى (ينهض من
مكانه) آل بتشكى ليه ، لا أغنى وأرخص ، ٣٥٠ الف جنيه
من لحم الحى دا الواحد بيقطعولوا ايد والا رجل بيصرخ
لما يقول بس ، ودى لا ايد ولا رجل دا شقى العمر كله .

الزوجة : طيب انت مش متفق مع الانجليز متاجرهم .

حسنيين : ما هو دا اللي شاغلنى ، قدامنا ٧ سنين عشان نلسم
حقها (بأسف) يا عالم بقى ، حنعيش ٧ سنين كمان والا
مش حنعيش .

الزوجة : ربنا يديك طولة العمر .

حسنيين : وهو أنا عاوز طولة العمر لنفسى !! أنا عملت كثير وقليل
خدت ايه ؟

الزوجة : اهو كل شىء بثوابه .

حسنيين : (متهمكا) أيوه بثوابه ، مش عاوزين ثوابه يا ست ، بس
ياريتنا خالصين .

(يدخل ثسر فراش المكتب يناول حسنين بييه خطابا
ويتصرف ، حسنين يفتح الخطاب ويقرا فيه)

الزوجة : خير انشالله .

حسنيين : سى ممدوح ياستى ، بقاله شهرين ماسألش فينا ، ودلوقت
باعت عاوز فلوس .

الزوجة : وماله ، ربنا يخليه ويصرف .

حسنيين : وماله ايه ، أنا أما كنت فى سنه ماكنتش لاقى أحلق • كان القرش أعز عندى من روحى ، كنت أضيع روحى ولا أضيعش القرش •

الزوجة : الزمن اتغير يا حسنين •

حسنيين : قولى اتشقلب ، حضرته بياخد ٤٠ جنيه فى الشهر ومش مقضيه •

الزوجة : بكره يبقى عال ، ويبقى باشمهندس قد الدنيا •

حسنيين : بس ينفع نفسه ، اهو بقاله ٣ سنين فى اولى هندسة ، أنا ما لقيتتش حد يودينى صنعة •
(تدخل سميرة ابنة شقيق حسنين من الباب وتسير
مهرولة)

سميرة : مساء الخير يا عمى ، ماشفتش بابا •

حسنيين : وهود حد بيشوف بابا الا كل فجرية •

سميرة : (مضطربة) دا خرج م الصبح مارجعش •

حسنيين : تلاقيه مرمى فى أى خمارة والا على أى رصيف ، ما هو أنا بصراحة بقى ، مافيش حاجة شاغلة مخى وميرجلانى أد اسماعيل أبوكى •• سيرتنا بقت فى بق الناس زى اللبانة •

الزوجة : اهو أخوك برضه يا حسنين ••

حسنيين : ما هو دا اللى مجننى ، يا ريته واحد غريب ، الا المصيبة أخويا •• النهاردة اللى ببشم ريحة خمرة فى أى حتة بيعرف ان أخويا اسماعيل كان فايت من هناك •

سميرة : ولا فيش طريقة يا عمى •

حسنيين : الطريقة الوحيدة انه يسيبنى ، أنا نائب البلد ولما أعدداء كتير ومش ناقص بلاوى •

الزوجة : يسبيك ويروح فين يا حسنين ، وهو ليه حد غيرك ؟

حسنيين : يروح يقعد مع ممدوح فى مصر • اللى عاوزه ياخذه بس يفارقنى •

(تبكى سميرة ، يتقدم حسنين منها ويربت على كتفها)

حسنيين : انتى زعلتى يا أموره ، ماتزعليش . . انا باتكلم من غلبى .
سميرة : ابدأ يا عمى ، انا مقدره موقفك ، انا مش زعلانة منك ،
انا زعلانة على أبويا .

حسنيين : انا اللي غايظنى يا بنتى ومجننى ، ان كل واحد عبقرى
(يشير الى نفسه) له ذلة . وانا ذلتى أخويا .

سميرة : ماتزعلىش يا عمى . دا نابليون بونابرت كانت نقطة
الضعف فيه أخواته .

حسنيين : هو انا فى الهم دا اللي عايش فيه نابليون . الله يكون
فى عونته راخر .

الزوجة : هو يعنى اسماعيل بيسكر ليه مش من غلبى ؟

حسنيين : غلبه ايه يا شيخه وبتاع ايه . دا كلام احنا بنقوله للناس
الغرب .

الزوجة : بقى واحد قعد ١٥ سنة فى السجن ، مش عاوز حياته
تتشقلب بالشكل ده !

حسنيين : وكان مين قال له روح اعمل بطل .

الزوجة : اهو كان شاب ، وفى البلد ثورة ، دخل السجن سنة ١٩
خرج لقى كل شىء عاد لأصله ، غرق نفسه فى الخمر .

حسنيين : اهو كل اللي اشتركوا فى الثورة النهاردة وزرا وباشوات
ومستورين ، اشمعنى اسماعيل لوحده اللي طلع م المولد
بلا حمص .

الزوجة : اهو بخته كده .

حسنيين : بخته والامخه ، طول النهار كان قاعد فى
مصر يخطب فى الشوارع والقهاوى ، آل ايه عاوز يحارب
الانجليز ، الانجليز اللي غلبوا الدنيا ، سى اسماعيل أخويا
عاوز يحاربهم ، اهو تنو يتحنجل لما مسكوه . والحجر
الداير لابد عن لظه ، والنبنى تفضونا م السيرة دى
(لسميرة) ابقى فكرينى يا بنتى اجيبلك هديه .

سميرة : عشان ايه يا عمى ؟

حسنيين : المدينة خلصت ، هنوقع العقد بعد ٤ أيام هيجيبلك هدية عمر
ماحد شافها .

- سميرة : مبروك يا عمى ، ربنا ما يحرمينش منك *
- الزوجة : ياما نفسى تخلص بقى من حكاية المدينة دى ، عشان نغرح
بسميرة وممدوح *
- حسنيين : انشاء الله ، كل شىء له أوان يا حسنية *
- الزوجة : ماذى احنا فى أوانه يا حسنين *
- حسنيين : دى حاجات عاوزه ترتيب ، ماتتأخدش كده جر كسوة ..
- الزوجة : واشمعنى انت خدتنى جر كسوة ؟
- حسنيين : دا شىء ودا شىء ، لما ممدوح يعرف يجيب قرش من بره ،
ويصرف على بيت نبقى نجوزّه *
- الزوجة : ما هو اسم النبى حارسه راجل وملو هدومه *
- حسنيين : وهدومه دى مين اللى جابها له ، هو اياك ، دا ما يعرفش
متر القماش بكام ، النهاردة ان حبيت أجوزه لازم يبقى
راجل *
- الزوجة : والنبى يا حسنين انا مانى فاهماك *
- حسنيين : ماهو الحق ما بيتفهمش دلوقت ، روى يابنتى يا سميرة
سختلى شوية فيه أحط فيهم رجلى ، الروماتيزم بينشر
على *
- (تخرج سميرة ، حسنين يتجه نحو زوجته وينظر اليها
بغضب)
- حسنيين : ميت مرة قلتلك ماتجيبش السيرة دى قدام البننت ،
ماتفتحيش ودانها *
- الزوجة : أفتح ودانها على ايه ، ماهم بيحبوا بعض *
- حسنيين : الحب دا فى السيمة بس ، انما هنا ماينفمش *
- الزوجة : دا عندك انت بس ، انما عندهم ينفع ..
- حسنيين : آل حب آل ، البوس والكلام الفارغ ده اسمه حب ، طيب
ولما يخلص الحب ياكلوا ايه ، يركبوا ايه ، يسكنوا فين *
- الزوجة : هوه مافيش غير الأكل والركوب والسكن يا حسنين *

حسنين : أمال فيه اليوس يس ، الحاجة الوحيدة اللي بابوسها بحق
وحقيق ابدى . اليوم اللي يرزقنى فيه ربنا بالف جنيه أبوس
ابدى وش وضهر ، انما الكلام بتعاع السيماء ده أنا
ماعرفوش .

الزوجة : دا انت باين عليك نايم فى العسل يا حسنين ، البت
بتحب الواد ، والواد بيحب البت .

حسنين : حبه برص ، ولما يحب بنت الريس سعد الله وحش ،
ما يحب فيها على كيفه . .

الزوجة : وهو الحب بالعافية ؟

حسنين : وبالعافية ليه ، ما يجبهها بالذوق والتراضى .

الزوجة : وكمان بنت الريس سعد الله ما تليقش لمدوح ، دى أكبر
منه و . . وكمان عزبة .

حسنين : الله ، ايه يعنى عزبة . عندها عيال ، ما عندهاش ،
خالصة من كله ، كل اللي عندها ٥٠٠ فدان حته واحدة
٥٠٠ فدان ماهومش ٥٠٠ سيجارة ، دا أنا أحب أمى لو
عندها ٥٠٠ فدان وأحب ستى كمان .

الزوجة : أيوه ، ياواخذ القرد على ماله

حسنين : يعنى عاجبك القرد على فقره .
(يشير الى الداخل يقصد سميرة)

الزوجة : ما دام بيحبه يبقى غزال . .

حسنين : وحد قاله مايحبوش ، مايحبه ، انما الجواز دا شىء تانى .

الزوجة : قطيعة الجواز واللى بيجوزوه ، يا ريتنا ماتجوزنا .

حسنين : يا ريتنا يا أختى ، كنا ضربناك على ايدك .

الزوجة : الله ، احنا هنتخانق والا ايه ؟

حسنين : واحنا كنا بطلنا خناق امتى ، مااحنا طول عمرنا فى الهنا دا

الزوجة : مش كفاية مسجونته طول النهار زى مايكون حكم علينا .

حسنين : ومين اللي سجنك يا أختى ، ماتهجى .

الزوجة : أهج فين ؟ أنت بتغضنا دقيقة عشان أهج ، أنا باتلم عليك .

حسنيين : عشان طول النهار طافح الدم والكوتة ، الروماتيزم هارى
جسمى ومش مريح نفسى ، قلبى تعب ووقف ومش مريح
نفسى كل دا عشان مين ؟ هوه انا هاخذ حاجة معايا ؟

الزوجة : احنا مش همنفض م السيرة دى ونقوم ناكل لقمة ..
حسنيين : هوه الاكل بقالوا طعم الايام دى ، دا الواحد زى ما يكون
بياكل طوب .

(يدخل الخواجة بنايوتى فجاة)

بنايوتى : اوه حسنين بيه ، (يتراجع عندما يلوح الزوجة) باردون
مدام ، باردون .

(تنهض الزوجة من مكانها)

الزوجة : (وهى تنصرف للداخل) اتفضل ياخواجا بنايوتى ،
(لحسنيين) انا رايحه احضر السفارة بس اياك تنفض م
المولد ده .

(تنصرف الزوجة الى الداخل)

بنايوتى : حسنين بيه النهارده ..
حسنيين : (مقاطعا) يا خواجا حلمك على . انت ايه ، مش يكون
عندك رحمة شوية .

بنايوتى : رخمة !! رخمة ازاي .

حسنيين : انت مش شايفنى غرقان لشوشتى ، هيه الناس طارت
يا بنايوتى فلوسك مضمونة ، انت يعنى ليك مليون جنيه .

بنايوتى : حسنين بيه خدت العزبة كله ب ٥ آلاف جنيه ، انا استلته ،
الف جنيه بس ، عزبة يساوى ميت الف حسنين بيه ،
ميت الف .

حسنيين : ميت ألف ، ايه ، بقى مش تحمد ربنا ، عزبة كلها تراب
وبرك ، مش تحمد ربنا .

بنايوتى : طيب انا بخمد ربنا بس عاوز فلوس .

حسنيين : فلوسك على عينى وراسى ، يومين ثلاثة كل الحكاية . يعنى
اصبر شوية .

بنايوتى : يصبر لامتى حسنيين بيه .

- حسنين** : أصبر شوية •
- بنايوتى** : يعنى شويه دى اسمه يوم ايه ؟
- حسنين** : هوه لازم باليوم ، ما تصبر شوية يا اخى ، هيه الدنيا طارت •
- بنايوتى** : الدنيا مش طارت حسنين بيه ، العزبة اللي طارت •
- حسنين** : الحق على انا يا بنايوتى ، واحد غيرى ماياخدهاش بنكلة .
انما اهى هفة والسلام ، اهى هفة والسلام يا بنايوتى •
- بنايوتى** : خفة ايه دى ، دى اسمه خفة والا اونطة دى •
- حسنين** : اونطة ، لا بقى اسمع يا خواجا بنايوتى ، انا ما سمعلكش تقول الكلام ده ، فلوسك على عينى وراسى ، اصبر على شوية وهاخدكم ، هتاخدكم وفوقهم بوسه •
- بنايوتى** : انا والله ••
- حسنين** : احنا هنعيد تانى ونحكى ، بقولك اصبر يومين تلاته وفوت على •
- بنايوتى** : يعنى آخر كلام حسنين بيه •
- حسنين** : انشاء الله آخر كلام •
- بنايوتى** : طيب سعيدة حسنين بيه •
- حسنين** : فى الف سعيدة يا سيدى •
- (يخرج بنايوتى من المكتب)**
- حسنين** : (يحدث نفسه) دى خواجات ايه دى ، هيه الدنيا طارت •
(تدخل خادمة جميلة فى سن سميرة)
- الخدامة** : المية سخنت يا سيدى •
- حسنين** : وبتتقصى كده ليه يا بت (مقلدا اياها) المية سخنت يا سيدى ، ماتقولى المية سخنت وبس •
- الخدامة** : مانا باقولك (بنفس اللهجة) المية سخنت ياسيدى •
- حسنين** : (مقلدا لهجتها) طيب ياستى كيبها •
- الخدامة** : اكيبها ، ليه يا سيدى ، انت مش متحط رجلك فيها •
- حسنين** : لا يا ستى ، انا خارج دلوقت ، حتى رجلىكى انت •

الخدمة : (وهي تنصرف) حاضر يا سيدى .

حسنيين : (يحدث نفسه) جتك البله ، (مقلدا الخادمة) خلصت
يا سيدى ، آل يعنى ماسكها الرعاش ، (يلقي بالمنشة)
واد يا نسر .

(يدخل نسر الفراش ، عجوز فى ملابس قذرة وممزقة)

نسر : أيوه يا فندم .

حسنيين : الباشمهندس جاى دلوقتى ومعاه خريطة المدينة ، خليه
يستذانى أنا راجع على طول .

نسر : حاضر يافندم ، يعنى آخذ الخريطة .

حسنيين : ما تاخدش حاجة يا بجم ، خليه يستذانى .

نسر : حاضر يا فندم .

حسنيين : أنا حاغيب عشر دقائق بس .

نسر : حاضر يافندم .

حسنيين : ابقى روح انسطل انت ولا تنفذ جنس حاجة م اللى قلتها لك

نسر : حاضر يا فندم .

حسنيين : امش حاضر فى نافوخك ، راجل بليد .

نسر : (يتراجع مذعورا وينظر لحسنيين بيه وبعد فترة صمت
قصيرة) حاضر يافندم .

(ينصرف حسنيين ويبقى نسر وحيدا ينظف فى المكتب
ويغنى أغنية قديمة من أغنيات ثورة ١٩١٩ ، احنا التلامذة
يا عم حمزة . يدخل عليه اسماعيل يتروح)

اسماعيل : مين ده ، نسر ، بتغنى ، الله الله ، احنا التلامذة كمان ،
مابقناش تلامذة ياواد ، احنا مشايخ ، وياريت حتى ،
احنا نسوان ، هاو ، آل نسر قال ، أهو انت بقيت فرخة .

نسر : وبعدين معاك ياسماعيل بيه ، انت مبسوط شوية وجاى
تتسلى على أنا .

اسماعيل : أمال تتسلى على مين يا واد ، مافيش غيرك اتسلى عليه ،
الباقيين بقوا وزرا وباشوات ، مافضلش غيرك ، لا مش

الت لوحك وانا كمان ، انا انسجنت ، وانت وضعت ، انا
أحد والآ لا ياواد .

نسر : جدح يا سيدى ، بس والنبي ترحل عنى بقى .

اسماعيل = (يجلس على أحد المقاعد) أرحل قين ياواد هو هو انا
التجيزى ، دا انا اسماعيل خطيب الثورة ، ولسه خطيبها
لحد تلوقت (يقلد الخطباء) أيها الشعب . ان الانجليز هم
سوس الأرض . كويسة دى .

نسر = والله تسيبنى انضف المكتب يا اسماعيل بيه ، أحسن
حسنين بيه زمانه جى .

اسماعيل : اخيه ، انت مش كنت زعيم عمال العنابر ياواد ، ايه اللى
جرالك ، طلعت م العنابر اشتغلت خدام عند حسنين ، لأ،
مش خدام ، اشتغلت كلب ، نسر روح ، حاضر ، نسر خد ،
حاضر ، تعال بوبى ، روح بوبى (يضحك) .

نسر : وبعدين معاك ياسماعيل بيه ، مايلاش اهانات بقى .

اسماعيل : الله . البوبى بيزعل ، طيب حقك على ، حقك على ، اسمع .

نسر : عاوز ايه ؟

اسماعيل : ورقة .

نسر : ورقة ، ورقة ايه ؟

اسماعيل : ورقة ، حته ورقة ، ماتعرفش الورقة ، ماشفتش ورقة أبدا

نسر : يعنى عاوز ورقة تعمل بيها ايه ، تكتب ؟

اسماعيل : لا مش عايز اكتب ، بطلت كتابة . نسيته . طلقته . عاوز
ورقة الف فيها حاجة .

نسر : هتلف فيها الازاة .

اسماعيل : اشمعنى دى عرفتها ، أيوه ازاة .

نسر : لا مفيش هنا .

اسماعيل : مافيش ورقة هنا ، أمال فيه ايه ؟ مش مكتب ده ، المكتب
مافيش فيه ورقة ، جرنال ، أمال الناس يتحط فى المكاتب
ايه ، لحفة ، مراتب ، ورقة يا بنى آدم ، ورقة !

نسر : خش جوه يمكن تلاقى •

اسماعيل : جوه فين ، فى المكتبة !؟

نسر : اهو تلاقى جوه وبس ••

اسماعيل : (ينهض) اخيه عليك ، آل مكتب آل ، الناس ترتب المكتب وانت ترش المكتب ، ازرعه ، ازرعه أحسن ، عشان حسنين بيه يستفيد ، خسارة حنة أرض زى دى تفضل فاضية كده ، أحرث المكتب • احرته !

(ينصرف الى الداخل ويعود نسر الى التنظيف والغناء)

(يدخل الباشمهندس فيهرع نسر لاستقباله)

نسر : يا الف مرحب يا باشمهندس ، أهلا وسهلا بالباشمهندس •

الباشمهندس: أمال حسنين بيه فين ؟

نسر : هنا ، اتفضل أقعد ، خمس دقائق وجى ، اتفضل •

(يجلس الباشمهندس)

نسر : قهوة بقى ••

الباشمهندس: لأ مش ضرورى ، متشكر قوى •

نسر : طيب فنجان شاي ، حاجة سخنة والسلام •

الباشمهندس: طيب شاي زى بعضه ••

(يذهب نسر لإحضار الشاي ، ويفتح الباشمهندس

الخريطة ، ويلقى عليها نظرة ، فيدخل اسماعيل من

الباب الأيسر ، يلقي نظرة على الباشمهندس ، ثم يتقدم

منه ، ويده على الخريطة)

اسماعيل : (وهو يمسك بالخريطة) عاوز دى ••

الباشمهندس: لا اتفضل ، انت عاوزها ؟

اسماعيل : أيوه لو سمحت ••

الباشمهندس: اتفضل ، مبروك انشاء الله ••

اسماعيل : الله يبارك فيك ويحفظك ••

الباشمهندس: الحقيقة دى حاجة مافيش كده ••

- اسماعيل : انت متقولى ، دانا عميت عشان واحدة زيبها ..
- الباشمهندس: دى من بختكم .. دى لقطه .
- اسماعيل : هيه لقطه بس . دى كنز .
- الباشمهندس: طيب مش تشوفها حضرتك
- اسماعيل : مانى شايفها وعارفها .
- الباشمهندس: لا عشان تاخذ فكرة .
- اسماعيل : دا رضه ، حد كان لاقى .
- الباشمهندس: يا سيدى عقبال الثانية والثالثة .
- اسماعيل : دى كفاية قوى ، دى رضه ، من حق انا اسماعيل أخو
حسنيين .
- الباشمهندس: أهلا وسهلا ، تشرفنا (ينهض) وأنا المهندس صلاح إبراهيم
- اسماعيل : أهلا ، اتفضل ، اتفضل اقعد ، عن اذنك ، ورايا مشوار
مهم قوى ، عن اذنك
- (يخرج من الباب الايمن ، ويجلس المهندس يصفر لحنا
ويتنظر فى ساعته قلقا . فيدخل حسنيين مسرعا)
- حسنيين : أهلا وسهلا ، لامؤاخذه ياباشمهندس .
- الباشمهندس: العفو يا حسنيين بيه ، على كل حال انا جيت الخريطة ..
- حسنيين : طيب عال ، علشان الكابتن ويليامز عاوزها يا سيدى نهار
ما نكتب العقد .
- الباشمهندس: بس ..
- حسنيين : على خيرة الله ، دا انا شاكر فضلك خالص ، اتفضل اقعد ،
اتفضل .
- (يجلس الباشمهندس وحسنيين)
- الباشمهندس: دا مشروع عظيم يا حسنيين بيه . مشروع عملى فيه فى الميه
- حسنيين : (فى تواضع مزيف) أمى شغلانه والسلام . كل الواحد
ما يقول يرتاح شوية يطلعو خازوق من تحت الأرض ،
انا يعنى كان مالى ومال الشغلانة دى .

الباشمهندس: ربنا بيدك الصحة والعافية *

حسنيين : أنا يعنى كنت ناقص ، غير شى قلت ، دى أرضنا وبدل ما تبقى مع الخواجا أهى تبقى معانا ، ودى احنا بنبنينا ونعمر الحتة ، وكمان نأجرها للانجليز ، وناخد فلوسهم ، وأهى تبقى فايده لمصر من جميع النواحي *

الباشمهندس: على كل حال أنت طول عمرك سيباق ورائد فى الوطنية ، وأياديك ظاهرة ومشكورة يا حسنين بيه *

حسنيين : وياريت بس خالصين يا باشمهندس ، دى الضرايب عاوزه منى خمسين ألف جنيه ، عاوزه تموتنا ، عاوزين يكتفونا بسلاسل مش يسيبوا العالم يشتغل ويعمر الدنيا *

الباشمهندس: ربنا يقدرك يا حسنين بيه *

حسنيين : ماهو مقدرنا والحمد لله ، انما هممه اللى مش مقدرنا ، خمسين ألف جنيهه ليه ، موه انا انجليزى ، د انا مقدم استجواب لمجلس النواب هاعمل هزه وشرقك *

الباشمهندس: بالمناسبة دى يا حسنين بيه ، أنت عملت لنا ايه فى حكاية الجارى *

حسنيين : (يقف كالنمر) مجارى ، مجارى ايه يا باشمهندس ، انا طول النهار أسمع الكلام ده ، داعيب يا باشمهندس ، الجارى أولى والا الضرايب ؟ الأهم الأول وبعدين المهم يا باشمهندس *

الباشمهندس: (مرتبكا) ايوه * بس * أنا * أصلى *

حسنيين : أنت راجل متعلم يا باشمهندس ، المصلحة العليا اولاً وبعدين الجارى والشغل ده *

(يتوقف حسنيين عن الكلام ثم ينادى نسر ، ثم يستأنف الحديث عندما لا يراه أحد)

حسنيين : لامأخذه أنا صدعت دماغك والواحد مش عارف يفروق أبدا ، أنا حاسس زى ماكون غارقان لشوشتى زى ماكون نايم تحت انقاض تحت هدد *

الباشمهندس: بكرة ترتاح يا حسنين بيه *

حسنيين : مافيش فايده ، مفيش راحة غير بالموت (يتوقف عن الكلام وينادى على نسر ، ثم يستأنف الحديث عندما لا يجيبه احد) اتفرج يا سيدى ، انا حارق دمي طول النهار ، والفراش ولا على باله ، تلاقيه متلقح على اى قهوة

(يستأنف النداء من جديد فيدخل نسر مكتئبا)

حسنيين : انت فين يا جدع انت ، بقالى ساعة بنادى عليك .

نسر : (بحزن) كنت فى البيت .

حسنيين : وانت بتشتغل هنا والا فى البيت ٠٠ ؟

نسر : ماهو المنجور بتاع البيت طفح غرق الدنيا ٠٠

حسنيين : وانت يعنى مهندس المجارى ٠٠

نسر : مانا كنت خارج أجيب الشاى للباشمهندس ، لقيت العالم بتجرى والولية بتصوت والبنت الصغيرة غرقانة فى الطنح كانت هتموت .

حسنيين : يا أخی موته تشيك بعيد عن وشى . انجر اجرى هات الشاى ، وشوفلى القلش فين .

الباشمهندس: مش ضرورى الشاى يا حسنين بيه .

حسنيين : مش ممكن ، لازم تشرب الشاى .

الباشمهندس: والله تعفينى ، انا عندى مشوار ضرورى .

حسنيين : (لنسر) طيب انجر من قدامى شوف القلش فين !

(يخرج نسر . فيستأنف حسنيين الحديث)

حسنيين : حاجة تجتن ، اهو مطلع روحى طول النهار بالشكل ده ، ومش ممكن استغنى عنه ، صديق الطفولة يا سيدى ، أعرفه من ٤٠ سنة ، كان زعيم زمان ، كان عاوز يخرج الانجليز من مصر ، تصوور ، مش عارف يشتغل فراش كويس ، كان عاوز يبقى زعيم ، بس لو كل واحد عرف قدر نفسه (بضحك) آل زعيم آل .

الباشمهندس: استاذن انا يا حسنيين بيه .

حسنيين : طيب يا باشمهندس (يفتح درج المكتب) اتفضل ، شيك
بالمبلغ ايه ، وكام يوم نبقى نتحاسب ونكتب شيك بالمبلغ
الفاضل .

الباشمهندس: على مهلك يا حسنين بيه ، وعلى فكرة ، الخارطة خدتها
اسماعيل بيه .

حسنيين : (مشدوها) اسماعيل بيه مين ؟

الباشمهندس: أخو حضرتك .

حسنيين : خدتها ازاي .

الباشمهندس: طلبها منى ، اديتها له ، ده كان مبسوط قوى .

حسنيين : ماهو طول عمره مبسوط قوى بالشكل ده .

الباشمهندس: ربنا يبسطه كمان وكمان يا سيدى .

حسنيين : تانى ، بس خدتها ازاي يا باشمهندس .

الباشمهندس: انا آسف اذا كنت . . .

حسنيين : دى عبارة ايه دى ، المهم تدبر لى واحدة تانية يا باشمهندس .

الباشمهندس: وليه وهيه التانية . .

حسنيين : احتياطى . ماهو لازم الواحد يحتاط برضه ، مع السلامة

يا باشمهندس ، الا اسماعيل بيه خد الخريطة دى ، مع

السلامة . . مع السلامة .

(يخرج حسنيين والباشمهندس . ويدخل نسر ومن خلفه

القلش . يرتدى ملابس بلدية)

القلش : انا عارف عاوزنى ليه فى السقعة دى ؟ الناس كلها كمشانة

فى بيوتها ، اשמعنى احنا انكتب علينا الشقا دا (يجلسن)

نسر : خليك اما ارواح اشوفه هوه راح فين .

القلش : روح موت انت راخر والطعنى هنا لما احرصص .

(يشعل سيجارة ويدخن فى عصبية . تدخل الخادمة)

الخادمة : يامه ، يانداشتى ، هوه المعلم هنا . .

القلش : ايه ! اتخضيتى يا حلوة ؟ سلامتكم . .

- الخدامة : وقاعد لوحذك ليه يا معلم ؟
- القلش : دماغى هتلق ، اعملى فنجان قهوة ينوبك ثواب فيه .
- الخدامة : ماقدرش يا معلم .
- القلش : ليه ، ايديكى مقطعة .
- الخدامة : بعد الشر ، انشا الله اللى يكرهنى ، أصل حسنين بييه
خرج بره .
- القلش : وانت عاوزه حسنين بييه ليه ، يولعلك الباجور .
- الخدامة : لا ، أصل مفاتيح الكرار معاه .
- القلش : انتو بتسمو البن كرار هنا ، طيب اعملى كباية شاي
فى عرضك .
- الخدامة : ماقلتك مفاتيح الكرار معاه ، وبعدين معاك يا قلش .
- القلش : قلش ، الله ع الجور ، ماتبلى النعمية دى يا بت حسيبى
ركبى .
- الخدامة : ماهى سايبه وحدها يا معلم .
- القلش : الله الله ، انت يعنى كنت جربتى ؟ طيب وسيدى الغريب
لاخد المكافأة واتجوزك .
- الخدامة : (تضحك) طيب وهو انا أرضى .
- القلش : ترضى ! ما بيقاش ده على راجل (ممسكا بشاريه) ان
ما تجوزتك .
- الخدامة : هوه بالعافية .
- القلش : دانا أخطك يابت ، دانا اكلك واللى خلقك .
- الخدامة : يامه ، مايحكش .
- القلش : طيب الايام بينا يا زينب يا بنت عبده ، انجرى من قدامى
اجرى اعملى كوباية ميه سخنة .
- الخدامة : ليه ؟ حتلق والا ايه .
- القلش : لا اطفحها ، الحة كابسة على نفسى هتموتنى .

- الْخَادِمَةُ : خليها تكبس اياك تاخذ أجلك ، عشان تبطل قعاد طول النهار عند عيشة •
- الْقَلَش : ومالها عيشة ، غير انه منها ليه ؟
- الْخَادِمَةُ : أنا غيرانه ، اغير من المقشفة دى •
- الْقَلَش : طيب ومالك محموقه كده •
- الْخَادِمَةُ : أنا محموقه ، مايحكمش ••
- الْقَلَش : طيب وسيدى الغريب لاخذ المكافاة واتجوزك •
- الْخَادِمَةُ : تتجوزنى •• مايحكمش ••
- (يسمع صوت رجل فى الخارج ، تجرى زينب الى الداخل)
- الْخَادِمَةُ : يانداشتى ، دا البيه باينه رجع •
- الْقَلَش : (يهز رأسه) صنف يخاف ما يختشيش •
- الْبِرْتَس : (يدخل المسرح) أهلا بالمعلم ، انت قاعد هنا وأنا دايخ عليك فى كل حنة ••
- الْقَلَش : خير انشالله ••
- الْبِرْتَس : شوفلى بريزة •
- الْقَلَش : هيه سورة والا ايه ، مانت لاهف بريزة الصبح بدرى ••
- الْبِرْتَس : طيب برضه شوفلى بريزة •
- الْقَلَش : وحياة سيدى الغريب مامعايا اللضا •
- الْبِرْتَس : اهرش جيبك يا راجل شوف بريزة •
- الْقَلَش : على الحرام ما معايا ريحتهم ، انت ايه ما بتؤمنش بالله •
- الْبِرْتَس : بقى انت مامعكش بريزة !؟
- الْقَلَش : الله ، اقطعك هدومى عشان تصدق ، ما تشتغل يا أخى ، مانت زى الفلق أهوه •
- الْبِرْتَس : انت يعنى شايف الشغل ملقح فى السكك •
- الْقَلَش : اشتغل معانا •

- البرنس : اشتغل معاكو ايه ، انا مجنون !
- القلش : ما العالم كلها بتشتغل فيها .
- البرنس : وخذوا ايه من وراها ، ماتوا واحد ورا واحد .
- القلش : والثوت ماهو أحسن م اللى انت فيه .
- البرنس : اهو بكره يمكن ربنا يفرجها .
- القلش : مش هيفرجها عمره .
- البرنس : عنها ما فرجت ، أهى احسن من الموت .
- القلش : والأعمار ماهى بيد الله يا بنى آدم .
- البرنس : بقى الواحد يرمى نفسه فى النار ، ويقول الأعمار بيد الله
دا جنان ايه ده ..
- القلش : وهيه دى نار يا خيخة ..
- البرنس : أمال دى ايه .. مهلبية ، هوه أنا مش عارف أصل الشفلة .
- القلش : على الحرام مانت عارف حاجة ، دول شوية مواسير
مرميين فى الجبل يا خيخة .
- البرنس : وهيه يعنى المواسير مرمية كده فى الجبل ، مايفش
حد جانبيها .
- القلش : ايه يعنى تلت اربع عساكر انجليز فى كل وردية .
- البرنس : وهمه يعنى العساكر الانجليز واقفين يرقصوا والا معاهم
مدافع ..
- القلش : واحنا ماحنا معانا مدافع .
- البرنس : وحتعمل ايه المدافع - عبده ماكان معاه مدافع - وحميدة
كان معاه ، عبد الرافع ، وشلبى وكل اللى ماتوا ،
عملوا ايه بالمدافع .
- القلش : اهو أجلهم كده ، وكل أجل له كتاب .
- البرنس : انت حتعملى محضر ، ما تشوف بريزة .
- القلش : احنا بنقرا فى سورة عبس ، ما قلتك معيش .
- البرنس : طيب شوف شلم .

- القلش : بقولك ما معييش ريحتهم *
- البرنس : طيب ولو نص فرنك *
- القلش : (يضيق) استغفر الله العظيم *
- البرنس : يا راجل خللى عندك دم ، بقولك ماتعشتش *
- القلش : حاجة تجزن صحيح (يفتش في جيوبه) اتفضل ، النص
افرنك أه ، اياك تحمد ربنا *
- البرنس : أنت يعني ياخى فنجرى قوى ، ماهى فلوس جورج كلها ،
شوفتى مواسير يا قلش *
- القلش : وماله شفتى مواسير ، أهو شغل ، والشغل للجدعان *
- (يسمع صوت حسنين من الخارج ، فيكف القلش والبرنس
عن الحديث ، يدخل حسنين)
- حسنيين : الله ، أنت هنا يا معلم ؟
- القلش : آدى احنا هنا *
- حسنيين : أمال نسر فين ؟
- القلش : أهو خرج يدور عليك مارجعش *
- حسنيين : (يلتفت الى البرنس) أى خدمة يا معلم ؟
- القلش : دا البرنس ، صديقى الروح بالروح يعنى *
- حسنيين : طيب ما تتفضل تقعد يا معلم *
- البرنس : تشكر يا ملك ، أصل أنا ورايا مشوار من غير مؤاخذة
استأجز بقى *
- (يخرج البرنس ، يجلس حسنين خلف المكتب)
- حسنيين : ايه الحكاية يا معلم ؟ انت مخاصمنا والا ايه ؟ أنت فين
بقالك كام يوم ؟
- القلش : كمشان من غير مؤاخذة *
- حسنيين : وكمشان ليه ؟
- القلش : لقينا الاعتزال أحسن *
- حسنيين : احنا شغلنا مايحبش الاعتزال اللى عاوز يعتزل يسبيننا *
- القلش : احنا ماسيناش ، انت اللى سبت يا حسنين بيه ، الرجالة
بقالهم كام يوم ماخدوش حقهم ، والرجالة اللى ماترا
ما صرفوش مكافآتهم *

- حسنيين : وأنا متاخر يا أخی ، همه كام راجل ماتوا ؟
القلش : أربعة .
- حسنيين : (يفتح الدرج) اتفضل أدى ميتين جنبه للرجالة . فيه
حاجة تانية ؟
- القلش : وحقوق الناس اللي عايشة ؟
- حسنيين : (يفتح الدرج) اتفضل أدى ميت جنبه ، خلص حالك
علشان تفضنا .
- القلش : الله ع الجو ، أهو كده الشغل .
- حسنيين : مبسوط يا عم ؟
- القلش : أنا مبسوط بوجودك واللى خلقك .
- (يدخل نسر ينظر اليهما في بلاهة)
- حسنيين : انت فين يا عم بقالك ساعة .
- نسر : عاوزين حاجة ؟
- القلش : عاوز فنجال قهوة يا عالم ، الحتة كابسة على قلبى
هتموتنى .
- نسر : حاضر . عاوزين حاجة تانية .
- حسنيين : عاوزين سلامتك .
- نسر : حاضر .
- حسنيين : (بثورة) حاضر فى نافوخك ، الخريطة فين يا بجم ؟
- نسر : خريطة ايه ؟
- حسنيين : خريطة المدينة .
- نسر : أنا لا شفت خرايط ولا رحى جنب المدينة .
- حسنيين : الخريطة اللي خدها اسماعيل .
- نسر : طيب وأنا مالى ومال اسماعيل ؟
- حسنيين : مانت كنت واقف يا بجم ، ماخدتباش انه ليه ؟
- نسر : هيه ايه ؟
- حسنيين : الخريطة .
- القلش : يا عالم فنجال قهوة ، الحتة كابسة على قلبى هتموتنى .
- نسر : وأنا مالى ومال الخريطة يا حسنيين بيه .

- حسنيين : الخريطة يا بجم اللي هناجر بيها ، امال هناجر ازاي ؟
- نسر : مايمكن اسماعيل بيه حطها جوه .
- حسنيين : طيب اتفضل شوفها لى ؟
- نسر : وانا بس هاشوفها فين ، وانا حتى ماشفتش اسماعيل بيه
غير خمس دقائق .
- حسنيين : شفته فين ؟
- نسر : هنا هه ، كان بيدور على ورقة يلف فيها ازازة .
- حسنيين : ورقة يلف ازازة ، يا خرابى .
- القلش : يا جدعان دماغى هتطلق ، الحتة كابسة على قلبى هتموتنى .
- حسنيين : ورقة يلف ازازة !؟
- القلش : ماهو كل يوم بيعمل كده ، وهيه دى فيها ايه ؟
- حسنيين : انت اتفضل قدامى ، شوفلى اسماعيل فين .
- نسر : وماشوف اسماعيل بيه فين بس ؟
- حسنيين : شوفوا وهاتهلولى من تحت طقاطيق الارض .
- نسر : وهى فين طقاطيق الارض دى ؟
- حسنيين : ان ماعرفتش هخللى الدبان الأزرق مايعرفش جتتك نين .
- القلش : يا جدعان دماغى ، الحتة كابسة على قلبى هتموتنى .
- حسنيين : اتفضل انجر قدامى ، اتفضل .
- نسر : (وهو يخرج) انا عارف بس راح أشوفه فين ؟
- حسنيين : يلف ازازة ، والله عال ، انا اشقى واتعب وهو واخسدها
يلف ازازة .
- القلش : طيب ماتشوفك واحدة تانية ان كنت عاوز تلف حاجة .
- حسنيين : ألف ايه وبتاع ايه بس يا معلم دى الخريطة بتاعة المدينة
- القلش : طيب ويعنى هيه انزلت ، ماللى خلقها خلق غيرها ، ماتروق
أمال ، المفتاح معاك .
- حسنيين : ليه عاوز حاجة م المخزن ؟
- القلش : لأ عاوز فنجال قهوة .
- حسنيين : طيب وعاوز مفتاح المخزن ليه ؟
- القلش : بقولك مفتاح الأرار .

حسنيين : ارار دا ايه ؟

القشش : انا عارف اسمه ايه ، هوه البن عندكو اسمه ايه ؟

حسنيين : بن ايه ؟

القشش : بقولك بقالى ساعة دايبخ على فنجال قهوة ، الحتة كايسة

على قلبى هتموتنى ، والبت زينب بقولها اعملى فنجال

قهوة ، قالت الليه معاه مفاتيح الارار .

حسنيين : يعنى باختصار عاوز فنجال قهوة ؟

القشش : ابوس رجلك .

حسنيين : (يقادى على زينب) يا زينب .

(تدخل زينب تتقصع)

زينب : نعم يا سيدى ، يامه ، هو المعلم هنا .

القشش : ادى احنا هنا ، على قلبها لطالون .

حسنيين : المفاتيح امه ، اعملى فنجان قهوة للمعلم

زينب : (وهى تنصرف نحو الداخل) يانداشتى ، مايحكمش

حسنيين : وهتطلعوا امتى يا معلم ؟

القشش : الليلة لو حببت .

حسنيين : لأ خليكو لبكرة .

القشش : وجب بكره بكره .

حسنيين : فيه حاجة سميئة قوى انشاء الله ، شوية مواسير عال العال

ورا كامب الشلوفة ، حاجة بتاع عشر تلاف جنيه .

القشش : ربنا يسهل وناكلهم ، أنا معايا رجاله زى الورد واللى خلقك

حسنيين : يعنى انشاء الله هنشيلهم .

القشش : قول يا باسط ، بس بقى يعنى من غير مؤاخذة يعنى ..

حسنيين : ايه تانى .

القشش : الهفتى خمسة .

حسنيين : الهفك خمسة !! .

القشش : ايوه من غير مؤاخذة ، أحسن أنا بقيت فنش ع الآخر .

حسنيين : مانا لهفك خمسة من جمعة .

القشش : وهمه الخمسة يعملوا ايه فى جمعة دا الراجل اللى زى

حالاتى يصرف خمسة كل يوم ، ثم يعنى من غير
مؤاخذة يعنى ...

حسنيين : ايه تانى ؟

القلش : انا طالع فى مخى حاجة يعنى من غير مؤاخذة يعنى ،
وعاوزك تحققها لى .

حسنيين : ايه دى كمان يا سيدى .

القلش : المكافاة .

حسنيين : المكافاة ! مكافاة ايه دى رخرة !

القلش : انا بعد الشر بعد الشر ، لما اموت تدفعلى كام .

حسنيين : ميت جنينه زى ما اتفقنا . الراجل، بياخد خمسين ، وانت
الريس تاخذ ميه .

القلش : كلام حلو ، انا عاوز المية دول وانا عايش .

حسنيين : والورثة !

القلش : انا الوريث الوحيد اللى فاضل .

حسنيين : ازاي بقى الكلام ده ؟

القلش : زى مايقولك كده ، انا لا ورايا ولا قدامى ، انا عاوز الميت
جنينه وانا حى ارزق .

حسنيين : بس كده هنكسر النظام ، وانت عارف مايفيش حد بياخذ
مكافاة الا بعد ما يموت .

القلش : ياسيدى التانيين لهم اهل ووراهم ناس ، انما انا حاجة
تانية ، آدى الله ، وآدى حكمته ، وعلى بكل ، راح افسوت
معاك خمسة جنينه ونهار ما ينفذ حكم الله هاتلى بيهم حته
بفتة وحتة قطنه ، وابقى ارمىنى فى ستين داهية .

(تدخل زينب فجأة ومعها فنجان القهوة)

زينب : القهوة يا معلم .

(ياخذ فنجان القهوة ويحتسى منه رشفة طويلة . وينظر

نحو زينب طويلا ويقول)

القلش : حاجة حلوة قوى .

حسنيين : دا بن يعنى مخصوص يا معلم .

القلش : (وهو ينظر نحو زينب) ربنا يزيد وبيبارك ، حاجة حلوة

قوى ، داخل مزاجى (ينظر لحسنيين) انى لازم آخذ المكافاة

حسنيين : مش وقته ، خلى المسائل دى نبقى نتكلم فيها
بعدين *

القلش : بعدين امتى ، انا ودينى لازم آخذ المكافاة *

حسنيين : احنا هنتكلم فى الموضوع ده تانى *

القلش : ده تانى وتالت : الا تانى دى ، ايوه تانى ** ودينى لاخذ
المكافاة *

زينب : يامه ، ومين دى اللي ترضى *

حسنيين : هيه ايه دى اللي هترضى يابت *

زينب : يوه يا سيدى ، دا المعلم آل عاوز قهوة تانى *

حسنيين : وماله ، اعمليلو قهوة تانى *

القلش : الا تانى دى ده تانى وتالت كمان ، دا بن يمنى مخصوص *

(تخرج زينب وهى تتقصع)

القلش : (وهو ينظر لزينب) حاجة حلوة قورى (لحسنيين)
بس انا عاوز المكافاة *

حسنيين : خلاص بعدين نتكلم فى الموضوع ده *

القلش : وجب ، بس الهفنى خمسة *

حسنيين : انت برضه مصر *

القلش : كويسة مصر دى، انا صريت حاجة، دانا كفى مخروق واللى
خلقك ، اللي فى ايدى مش ليه ، انا واسطة واللى
خلقك *

حسنيين : طيب يا معلم ، ودلوقت بقى هنععمل ايه *

القلش : منطلع بكره *

حسنيين : طيب عال ، بكره بالليل تطلعوا ع الجبل ، المواسير كلها
عاوزها تنزل على السويس بكره باذن الله *

القلش : انشاء واحد اُحد ، استأجر انا *

حسنيين : ماتستنا القهوة *

القلش : مش فاضى ، بس الهفنى الخمسة *

حسنيين : اتفضل يا سيدى ، مع السلامة *

(حسنيين يرفع سماعة التليفون ويطلب رقما من اربعة
ارقام)

حسنيين : (فى التليفون) مساء الخير يا خواجه لوانيدا ، الله ، امال
هوه فين ؟ راح للكابتن ويليامز ، انا حسنين ، طيب لما
بيجى بلغوا ، ايوه وحياتك *

(يضع سماعة التليفون فيدخل نسي الفراش)

حسنيين : يعنى جاي مدلدل كده عامل زى الجردل المخروق *

نسر : وانا هاعمل ايه ، اذا كنت لفيت الدنيا مالقيتوش *

حسنيين : رحتم بور توفيق **

نسر : لا مارحتش **

حسنيين : رحتم الاربعين ؟

نسر : لا مارحتش **

حسنيين : رحتم شارع النمسا ؟

نسر : لا مارحتش **

حسنيين : امال دنيا ايه بقى اللى لفتها ، اياك رحتم بيتكو **

نسر : لا مارحتش **

حسنيين : امال رحتم فين يا بجم **

نسر : لفيت الدنيا كلها ** انما هالقيه فين والا فين ، العالم

كلها زايلة بره ، هوه النهاردة فيه عيد ؟

حسنيين : عيد ايه يا بجم ؟

نسر : امال العالم زايلة بره ، وعمالة تصرخ زى مايكونوا

اتجننوا *

حسنيين : ماحدث اتجنن غيرك انت واسماعيل اخويا ، جك جنان

يهديك *

نسر : باكلكم دوغرى يا حسنيين بيه ، اخرج بره شوف بنفسك،

مافيش راجل واحد واقف على بعضه بره **

حسنيين : تعرف تنجر بره انت وتغور من وشى ، داهية تغورك *

(يتصرف نسي وتدخل زينب)

زينب : القهوه يا معلم **

حسنيين : معلم فى عينك ، معلم دا ايه ؟

زينب : المعلم القلش ، الله هو خرج **

حسنيين : ايوه خرج **

- زينب : طيب والقهوة يا سيدى ؟
 حسنين : حضيها فى جيبي ، كبيها على ..
 زينب : اسم الله على مقامك يا سيدى ، طب ده كب القهوة خير
 يا سيدى ..
 حسنين : انجرى غورى من وشى انت رخرة ..
 زينب : طيب والقهوة يا سيدى ؟
 حسنين : انت هتنجرى والا اكسر وشك ؟
 زينب : طيب ماتزعلش يا سيدى .

(تنصرف زينب ، ويدير حسنين قرص التليفون فيدخل
 القلش)

- حسين : (يضع سماعة التليفون) خير يا معلم ايه اللى رجعت تانى
 القلش : البلد كلها زايطة بره ، والعالم هايحج فى الشوارع زى
 الأسود .
 حسنين : الكلام ده ايه ، دا نسر بيقوللى دلوقت مش مصدقه . ايه
 الحكاية ؟

- القلش : انا عارف ، اهو ناس عماله تزعق ، وناس بترقص ، وناس
 بتتهفت ، والعالم ملمومة حوالين الراديو زى النمل .
 حسنين : والناس بتقول ايه ؟

- القلش : حاجات تموت م الضحك . ال ايه ، يسقط الانجليز ، تسقط
 المعاهدة .

حسين : تسقط المعاهدة !!

القلش : ال آه ، دا آخر جو برة ..

- حسين : ماسالتش ايه الحكاية ؟
 القلش : وانا مالى ومال خوتة الدماغ دى .

(تدخل زينب بسرعة)

- زينب : سيدى ، سيدى ، دا فيه عالم كتير فى الشارع اللى ورانا ،
 وعمالين يقولوا يعيش حسنين بيه .

حسين : حسنين بيه !

زينب : أى والنبي يا سيدى (تلفتت للقلش) الله ، انت جيت
يا معلم ، أجيبك القهوة ؟

القلش : مافيش بأس ، أنا ودينى لآخذ المكافاة •

حسنين : (للقلش) هو دا وقته ؟

القلش : ومش وقته ليه ، وهيه فيها ايه لما يهتفرو بحياتك ، مانت
نائب البلد ، وأجدع شنب فى البلد خدام عندك •

زينب : افتح الشباك اللى ورا يا سيدى عشان تسمعهم ؟

حسنين : لأ ما تفتحيش حاجة ، همه كثير •• ؟

القلش : الا كثير ، دا عالم زى النمل بره ، والاكاده اسماعيل بيه
شايلىنه جماعة منهم ونازل كلام •

حسنين : اسماعيل مين ؟

القلش : أخو حضرتك •

حسنين : ماشفتش معاه خريطة ؟

القلش : أنا شفت حاجة ، دا حتى كان بيتكلم ماسمعتش منه حاجة •

حسنين : روحى انت يا زينب شوفيهم لسه كده واقفين •

زينب : (وهى تنصرف) حاضر يا سيدى •

القلش : (ينظر لزينب) ودينى لآخذ المكافاة ••

حسنين : احنا فى ايه والا فى ايه ، دا كل واحد فى وادى •
(يحدث نفسه)

يا خير اسود ، المدينة اللى حطيت فيها دم قلبى ، تسقط
المعاهدة ، وكمان اسماعيل بيخطب •

القلش : وماله ، ما اسماعيل بيه طول عمره كده •

حسنين : وكان بيقول ايه سى اسماعيل ؟

القلش : كان بيقول ايه ياقلش ، الله م صلى على سيدنا النبي كان
بيقول ايه ، آه ، حاجات تموت م الضحك ، آل ايه ،
الانجليز سوس الأرض (يضحك) أهو كلام •

حسنين : طيب اسمع ، انت قافل كويس على مخزن السلاح •

القش : الاقل ، دانا متربس ، والمواسير رخره جوه ، كافة شىء
فى امان ، الله ، انت مهزوز كده ليه ، هوه ايه اللي
حصل ؟

حسنيين : مش عارف ايه اللي حصل ، انما انا شامم ريحة مصايب
فى الجو (محدثا نفسه) يا خبر اسود ، تسقط المعاهدة ،
٣٥٠ الف جنيه ، دى مصيبة .

القش : واحنا مالنا ومال المصايب ، هيه اللمة دى مصايب ، دى
عالم تخاف ماتختشيش ، دا عسكرى واحد يجريهم واللى
خلقك .

(تدخل سميرة بسرعة)

سميرة : عمى ، عمى ، عرفت اللي حصل .
حسنيين : لا ، انت سمعتى حاجة ؟
سميرة : الحكومة لغت المعاهدة النهارده .
حسنيين : سمعتى بودانك .
سميرة : أيوه يا عمى .

حسنيين : (يجلس واضعا رأسه بين راحتيه ثم يحدث نفسه) يا خير
اسود ، دا النهارده كان فيه جلسة صحيح ولاخدت بالى ،
لغوا المعاهدة والمدينة ، أنا قلبى حيقف .

سميرة : وناوى تعمل ايه يا عمى ؟

حسنيين : هاعمل ايه يا بنتى ، دا شغل ناس مجانيين ، لما الحكومة
عاوزه تعمل كده ، ماشورتناش ليه ، هو احنا طراطرير ،
هو مافيش رجاله فى البلد (محدثا نفسه) ٣٥٠ الف
جنيه يا عالم ، هو مافيش رجالة فى البلد .

القش : الرجالة على قفا مين يشيل ، بس تؤمر .
حسنيين : دى مش حكومة ، دى عصابة .

القش : ايه الحكاية ماتفهمونا ، هوه فيه عصابة تانية فى البلد
غيرنا ؟

حسنيين : والله عال ، هيحاربو الانجليز ، الانجليز اللي غلبوا هتلر ،
هتجاربهم الحكومة ، (يحدث نفسه) وهناجر المدينة ازاي
دلوقت (بصوت عال) وهيحاربوهم ازاي ؟ بزعاذبع
قصيب ؟

- القلش : ليه ، السلاح موجود ، بس تؤمر .
 حسنين : (صارخا) دا لعب عيال .
 القلش : ماترعلش نفسك احنا مالنا ومال الكلام ده ، احنا طالعين
 بكره واللى خلقك .
 سميرة : اروح اجيب الراديو هنا يا عمى .
 القلش : مافيش بأس . هاتيه نسمع طلب .
 حسنين : لا ، ماتجيبش حاجة ، روح انت يامعلم شوف الجو ايه
 بالظبط . ان لقيت اسماعيل هات منه الخريطة .
 القلش : الله ، دول جايين على هنا ايه .
 حسنين : مين هم اللى جايين .
 القلش : الجماعة المتظاهرات دول .
 حسنين : جايين .
 القلش : أيوه هم .

(تسمع هتافات تقترب . تسقط المعاهدة)

- حسينين : خشى جوه انت يا سميرة ، خليك معايا يا معلم قلش .
 (تسمع الهتافات بوضوح)
 القلش : الا تسقط المعاهدة دى ، ما تسقط ألف مرة ، وياه يعنى ،
 مش غايته يمنعوا المرور من على طريق المعاهدة ، احنا
 مابنفوتش من هناك واللى خلقك .
 (تقترب الهتافات ، ثم تدخل المظاهرة وعلى رأسها
 اسماعيل)

- حسينين : (للمتظاهرين) متشكرين ، متشكر ، كتر خيركم ، كل واحد
 ينصرف الى عمله ، الظروف عاوزه الهدوء ، الهدوء
 أرجوكم .

(هتافات يحيا النائب الوطنى)

- حسينين : انشاء الله خير ، باذن الله خير ، اتفضلوا انصرفوا ،
 متشكرين . متشكرين .

(ينصرف المتظاهرون ، ويبقى اسماعيل)

- اسماعيل : يا سلام ، مين كان يصدق ، البلد صحيت تانى يا جدعان ،
 يا سلام ، صحيح يحيى العظام وهى رميم .

- لقاش** : يا سلام ع الخوته ، ما تعملولنا ككنة قهورة •
- حسنين** : اظن عاجبك منظر كده ، وانت وسط الصياح دول •
- اسماعيل** : دول مش صياح يا حسنين ، دول الشعب ، دول الناس
الى عملوك نائب ، انت نسيتهم •
- حسنين** : صحيح انك مجنون (ينتزع الخريطة من يده) وكم ان واخذ
الخريطة تلف فيها ازايز •
- اسماعيل** : الله هيه خريطة •
- حسنين** : انت من بكره لازم تشوفك طريقة ، مالكنش قعاد هنا •
- لقاش** : الله ، ماتروق امال ، هوه حصل ايه بس •
- حسنين** : وانا كمان م النهارده مش بايتلك هنا ، وانت م الصبح
بدرى تطلع على مصر ، روح أقعد مع ممدوح ، استناني
يا معلم اغير هدمى واجيلك •
- (ينصرف حسنين ، ويبقى اسماعيل والقلش)
- لقاش** : الله هيه ايه العبارة بس •
- اسماعيل** : الحكومة لغت المعاهدة يا معلم •
- لقاش** : ماتلغيها ، طب واحنا مالنا ، اما دى عبارة بصحيح •
- اسماعيل** : يعنى مابقاش فيه شئط ، مابقاش فيه مواسير !
- لقاش** : الله ، همه لغوا المواسير رخره •
- اسماعيل** : يعنى بقت حرب •• عارف الحرب •
- لقاش** : الا عارف الحرب دى ، دا انا شغال مع الانجليز مدة الحرب
كلها ، انا ماحدث كسب ادى ايام الحرب •
- اسماعيل** : اُمى دى حرب رخره يا معلم ، بس من غير مكسب •
- لقاش** : وهيه فيه حرب من غير مكسب ، دى الحرب تفرج ع العالم
المقاطيع دى كلها •
- اسماعيل** : لا دى مش حرب م اللى فى بالك ، دى حرب مع الانجليز
يا معلم •
- لقاش** : وهوه صنف الانجليزى يعرف يحارب ، الانجليزى من غير
مؤاخذه مش جددع فى الحرب •

- اسماعيل : انت اجدع يا معلم .
- القلش : الله يكرمك ، حاكم الانجليز دى انا خابزها وعاجنها ، ماهر
الانجليز دول صنفين ، صنف حر ، وصنف مزيف .
- اسماعيل : بقى فيه انجليزى حر ، وانجليزى مزيف .
- القلش : امال .
- اسماعيل : وتعرف الانجليزى الحر ازى ، ترنه !!
- القلش : اعرفه من قفاه من غير مواخذه ، الانجليزى الحر تلاقى قفاه
زى وشه .

(يضحك اسماعيل بهستيرية)

- القلش : امال حاكم انا عاجن صنف الانجليز ده وخابزهم .
(يدخل ممدوح ابن حسنين يادى التعب من اثر السفر
ومعه اثنان من اصدقائه ، يهب اسماعيل لاستقباله
بالاحضان)
- اسماعيل : اهلا بالبطل ، اهلا ممدوح ، وحشتنى خالص .
- ممدوح : اهلا بيبك يا عمى ، اقدملك صالح وعبد الرحمن ،
زمائلى ..
- اسماعيل : اهلا بالحبايب تشربوا كاسين يابنى ؟
- ممدوح : متشكرين يا عمى ، احنا جاينين م السفر لسه وتعبانين
خالص ، من حق ازى بابا ، وازى طنط ، وازى سميرة؟
- اسماعيل : بتسأل عليك كل يوم يابنى ، دايمًا بتسأل عليك ، بس ايه
اللى جابكو دلوقت يابنى ؟
- ممدوح : احنا جاينين عشان ننظم حركة الكفاح فى المدينة بعد الخاء
المعاودة .
- اسماعيل : (مبتهجا) اهو كده الشغل يابنى الحمد لله اللى عشت لحد
الحكومة ما لغت المعاودة .
- ممدوح : حكومة مين يا عمى اللى لغت المعاودة ، اللى لغى المعاودة
الشعب ، المظاهرات اللى طول الليل والنهار ، وحملة
الصحف المجيدة ، الحكومة لغت المعاودة تحت ضغط
الشعب ، كل حكوماتنا لملاسف ضالعة مع الانجليز .

اسماعيل : المهم يابنى خذونى معاكو ، انفع عسكرى معاكو يابنى .
ممدوح : مافيش كلام يا عمى ، دانت القائد بتاعنا ، أمال هوه بابا فين ؟

اسماعيل : جوه يابنى ، اتفضلوا خشوا . استريحوا جوه اجسن .
(يدخل حسنين وهو يحاول ارتداء البالطو فيفاجأ
برؤية ابته)

حسنين : الله ، ممدوح ، انت ايه اللى جابك دلوقت يابنى .

القلش : جأى عشان الكفاح .

حسنين : كفاح ، كفاح ايه ؟

اسماعيل : (ساخرا) اختراع جديد اسمه الكفاح .

ممدوح : انا موفد يا بابا من الجامعة مع زمائلى عشان تنظيم حركة
الكفاح فى المدينة .

حسنين : طيب . بس يابنى انتو طلبة ، ودروسكم وعلومكم !

ممدوح : ماهو ده أهم يا بابا من دروسنا وعلومنا .

حسنين : على كل حال انتو رجاله دلوقت وتعرفوا مصالحكم ، بس
يعنى البلد ماهى مليانة عساكر ، انما احنا محتاجين
دكاترة ، ومهندسين ، وان كان عشان حرب الانجليز ،
ما هى البلد مليانة صياح ياكلو اللحمة نية .

القلش : الرجالة على قفا مين يشيل بس تؤمر .

ممدوح : على كل حال طلبة الجامعة كانوا همه الطليعة دايما
يا بابا ، ولازم نكون فى أول الصف .

حسنين : اللى انت عاوز تعملو يابنى اعملو ، بس أنا مش موافق
أبدا على اشتراك الطلبة فى الحرب . بلدنا عاوزه ناس
متعلمة ، والانجليز غلبوا العالم بالعلم مش بالعساكر .

اسماعيل : كلام فارغ ، الانجليز دخلوا بالمدفع ، يخرجوا بالمدفع ،
والعلم بييجى بعد كده .

القلش : الأدب فضلوه ع العلم .

حسنين : خش انت نام ياسماعيل .

اسماعيل : انا ماني طول النهار نايم ، وهو دا يوم حد ينام فيه .
حسنيين : على كل حال اتفضلوا باتوا ، البيت بيتكم والصبح يحلها
الف حلال .

ممدوح : احنا متشكرين قوى يا بابا ، والموقف الكريم ده ، كان
منتظر منك .

اسماعيل : قوى ، قوى .

حسنيين : احنا كلنا يابنى كنا منتظرين يوم زى ده ، وأنا شخصيا
افخر طول حياتى ان مجلس النواب اللى لغى المعاهدة ،
انا كنت عضو فيه .

اسماعيل : الله . سبحان الله .

القلش : أيوه كده وحدوه .

حسنيين : والواحد يحمد ربنا انه ختم حياته السياسية بعمل زى ده .

القلش : يالله مسك الختام .

ممدوح : ختام ايه يا بابا ، دا انت أجمد منى .

حسنيين : لا يابنى يا ممدوح ، انا الروماتيزم مرا بدنى ، ووصل
للقلب خلاص .

ممدوح : سلامتك يا بابا .

حسنيين : البركة فيك انت بقى يا ممدوح ، والبركة فى اخوانك وزميلك
(للقلش) طيب يا معلم قلش ، اتفضل انت بقى . وانا مش
ماخرج الليلة دى .

القلش : وجب ، بس يعنى .

حسنيين : عاوز حاجة ؟

القلش : أيوه بس ماقلتلناش بكره نخرج الساعة كام ؟

حسنيين : (يغمز بعينه) طيب بكره بقى انشاء الله .

القلش : مانا عارف انه بكره ، بس يعنى الساعة كام .

حسنيين : (يغمز له) ما هو نتفاهم بكره .

القلش : يعنى احضر الرجالة والسلاح .

ممدوح : رجالة وسلاح ليه يا بابا ، الله ، انتو بداتو عمليات المقاومة ؟

حسنين : أيوه ، أيوه يا ابني بداننا ، بداننا ، حضر الرجالة والسلاح يا معلم .

ممدوح : دا شيء عظيم والله يا بابا ، ماكانش منتظرين كده أبدا .

اسماعيل : لا انتظروا ، دا فيه حاجات من ده كثير .

ممدوح : وعملتوا فعلا كتايب .

القلش : كتايب ايه ، احنا لا بنقرا ولا نكتب ، احنا بنلقح جتتنا فى النار ونطلع منها خالصين بعون الله .

حسنين : الشعب كله نار يا ابني زى ما انت شايف كده ، نار مشعله .
ممدوح : اسمحلى يا معلم يا معلم .

القلش : محسوبك القلش .

ممدوح : اسمحلى يا معلم القلش أبوسك ، وأرجو انك تقبلنا ضمن رجالتك ؟

القلش : وماله ، وبدل ما نطلع طلعة نطلع طلعتين ، ولقمة هنية تقضى ميه .

عبد الرحمن : يا سلام ، الشعب كان بيشتغل لوحده ، يعنى ماكانش منتظر أمر الحكومة .

القلش : هوه قاطع عيشنا وواقف فى سكتنا غير الحكومة . دا لولا البوليس كنا شيلنا مواسير الجبل كله واللى خلقك .

اسماعيل : أيوه لولا البوليس فعلا ، كانوا شطبوا ع الانجليز كلهم .
ممدوح : أهو البوليس بقى معانا يا معلم . .

اسماعيل : على خيرة الله ، بيقى متشطبوا ع المواسير كلها . .

ممدوح : مواسير ايه يا عمى ؟

حسنين : (متدخللا بسرعة) خش يابنى يا ممدوح انت وزمايلك اغسلوا وشكوا ، وغيروا هدموكر اتفضلوا ، اتفضلوا جوه .

ممدوح : طيب عن اذنك يا بابا ، عن اذنك يا عمى .

اسماعيل : لا انا جى معاكو ، اتفضلوا .

(يحمل بعض الحقايب ، ويقدمهم الى الداخل ، ويبقى
حسنيين والقلش على المسرح)

حسنيين : (للقلش) خد بالك كويس وفتح عينك اوعى حكاية المواسير
دى ، والشغل بتاعنا حد ياخذ بيه خبر ، احنا من دلوقت
كتايب .

القلش : يعنى بلاش مواسير بقى ، نبطل شغل .

حسنيين : والشغل ماله ، بس يعنى خد بالك ، اوعى لسانك يقع
بكلمة كده والا كده ، انت هتشتغل معاهم كتايب ، فاهم ؟ .

القلش : السطه كده يا حسنيين بيه .

حسنيين : وتفهم الرجاله بتوعك كمان ، ممدوح بالذات مش عاوزه
يفهم حاجة خالص . انا العلاقة بينى وبينه من ايام المرحومة
امه ما ماتت ، وهى علاقة رسمى خالص ، كل اللى يعرفه
ان أبوه نائب ومقاول ، شغل المواسير والحاجات دى
ما يعرفش عنها حاجة ، والمهم يفضل على عماه كده
على طول .

القلش : طيب افرض واحنا بنشتغل شاتونا .

حسنيين : وهيشقونا ليه ؟ ماتعمل شغلك فى السر .

القلش : يعنى نطلع لوحدينا .

حسنيين : أبدا ، دا معاهم بيقى أحسن ، أولا البوليس مش هيقف فى
سكتك ، وثانيا اللى يموت هبقى شهيد ، واللى يعيش هبقى
بطل ، (يمسك بكتف القلش ويضحك) هتبقى بطل
يا معلم ، بطل .

(يدخل ممدوح فجأة ، ومعه زملاؤه واسماعيل)

ممدوح : الا بطل ، دا بطل الأبطال يا بابا .

اسماعيل : (ساخرا) والاش لما تشوف الأبطال الثانية . .

ممدوح : يا سلام يا بابا ، أنا ماكنتش مقدر بالطبط عظمة
الشعب ده .

القلش : احنا طول عمرنا فداوية ، وانشاء واحد أحد منطلمع
معاكو .

مصوح : يا سلام يا معلم ، دا احنا اللي نترجاكو انكو
تاخدونا معاكو .

القلش : اتقننا .

مصوح : متشكرين قوى يا معلم ، تعال اما أبوسك ، بالحضن
يا معلم ..

(يتعانقان)

اسماعيل : (ساخرا) أمى دى قبلة الموت يا جدعان .
(صالح وعبد الرحمن يضحكان)

سسستاز

الفصل الثاني

(المنظر مكتب حسنين بيه الذى ظهر فى الفصل الاول .
وبه أسرة وأسلحة ومهمات وثياب للفرانجيين ، حسنين
يجلس خلف المكتب ومعاه زوجته ، يرتدى روب دى
شامبر فوق البنطلون والقميص)

- حسنين : (بسخرية) هوہ بسلامته روميل مارجيش
- الزوجة : وبعدين معاك يا حسنين ، مش متبطل تريقه
- حسنين : (بتهنؤ وبتمشى فى الحجره) آخر زمن بصحيح ، باعتسه
يتعلم هندسة ، رجعلى عسكري ، قصدى قائد أبوه قائد
- الزوجة : يا ريت كان عندى خمسة زيه ليوم زى ده
- حسنين : أبوه يا اختى ياريت كان عندك خمسة زيه ، خمسة زملطحية
- الزوجة : هوہ الراجل فى الزمن ده بقى زملطحي ، الله يرحمك
يا جدى
- حسنين : اخوتينا بجدك ، آل يعنى كان روميل
- الزوجة : أحسن من روميل ، كان ظابط فى جيش عرابى ، النياشين
بتاعته لسه عندى جوہ • الله يرحمك يا جدى ، كان دايمًا
يقول الراجل بصحيح هوہ اللى يشوف مصلحة بئده
- حسنين : الراجل فى الزمن ده هوہ اللى يشوف مصلحة نفسه

- الزوجة :** هو كله عندك مصلحة نفسه ، مصلحة نفسه .
- حسنيين :** ما هو دا العبط بتاعك يا وليه ، مصلحتي يعني مصلحة التانيين ، انا عندي ثروة بتاع نص مليون جنيه بتشتغل ، بتشتغل مين دي . لأمى . كام عيله بتاكل من وراهم . . (يضرب كفا بكف) وآخر المتة هاموت وأسبب كل شىء لحضرة القائد .
- الزوجة :** واحنا فى ديك الساعة اللى يبقى لينا ابن قائد وبيدافع عن المدينة .
- حسنيين :** (وهو يختلس النظر نحو الحجرة المجاورة) أيوه صحيح . الدفاع واخذ حقه قوى ، خشى شسوتى السوارىخ اللى جايينها ، والا القنابل الذرية اللى معاهم ولعب عيال ، لعب عيال وآخرته وحشه .
- الزوجة :** ما تفرض انه لعب عيال ، وانت خسران ايه ؟
- حسنيين :** ولا حاجه ، يا فرحتى انا ، الحصال واقف والحمد لله ، منخر ايه بعد كده ، وياريت الانجليز طلعو ، انما انشاء الله روحنا متطلع قبل ما يطلعو .
- الزوجة :** انا والنبي دماغى ماهى فاضية للكلام ده ! انا قايمه داخله جوه أشوف شغلى .
- (تنهض الزوجة لتتصرف ، يجذبها حسنيين من يدها)
- حسنيين :** تعالى خدى رايحة فين ؟ الواد موجود هنا وأهى فرصة نجوزه بنت الرئيس سعد الله .
- الزوجة :** ممنوح ما يتجوزش بنت الرئيس سعد الله ، ممنوح يجوز على كيفه .
- حسنيين :** ٥٠٠ فدان يا وليه حته واحدة ، ٥٠٠ فدان مش ٥٠٠ ماسورة .
- الزوجة :** انشا الله يكونوا ٥ تلاف - ممنوح يتجوز اللى على كيفه .
- حسنيين :** يعنى آمال عاوزاه يتجوز بنت الفقري .
- الزوجة :** أهو أخوك .
- حسنيين :** والنبي لما يكون آخر يوم فى عمرى .

للزوجة : أهو ابنك عندك كلو بعض (تنصرف)
(يذهب حسنين ويجلس خلف المكتب فيسمع حركة في
الحجرة المجاورة)

حسنيين : دا مين ده ، أنت رجعت والا ايه يا ممدوح ؟

سميرة : دأنا سميرة يا عمى .

حسنيين : سميرة ، ازيك يا بنتى .

سميرة : الله يسلمك يا عمى .

حسنيين : هوه مافيش حد رجع م الفدائين .

سميرة : لأ مافيش حد رجع يا عمى .

حسنيين : ماشوفتيش ممدوح النهارده .

سميرة : شوفته الصبح يا عمى ، من ساعة ما خرج مارجعش .

حسنيين : ومالك خايفه كده ليه .

سميرة : خايفة يا عمى ليكون .

حسنيين : هيكورن ايه يعنى ، غايته بيفتش ع الجيش بتاعه فى

الحرارة اللي ورانا .

سميرة : والنهاردة الصبح كان متحمس قوى ، دا أنت لو شفته فى

الأودة النهاردة .

حسنيين : مافيش بأس م الحماس جوه الأولاد ، ما بيكلفش حاجة .

سميرة : دانا خايفة موت يا عمى .

حسنيين : (تلمع عيناه بفكرة جديدة) أنت خايفة على ممدوح يا بنتى

سميرة : على ممدوح وعلى كل اللي معاه يا عمى .

حسنيين : على أنا الكلام ده يا سميرة انا عارف كل حاجة ، أنت

فاهمانى عجوز يا بنتى ، أنا برضه شايف وعارف .

(سميرة تنظر الى أسفل)

حسنيين : الحقيقة يا بنتى ، أنا خايف اكثر منك . انما اهو كلام

باطمن بيه نفسى ، هيه ، بس لو كان عندى غيره .

سميرة : ربنا ينجيه يا عمى .

- حسنيين** : أنا مش مخوفنى موته ، أنا اللي مخوفنى انه يقع فى
أيديهم ، عارفه بيعملوا ايه جوه الكامبات يا بنتى .
- سميرة** : لأ يا عمى .
- حسنيين** : عندهم كلاب مخصوصة . الكلب من دول زى الأسد .
يسببوا الكلاب عليهم ينهشوهم لحد الموت .
- سميرة** : يا خبر يا عمى .
- حسنيين** : هو بس كده ، وخراطيم المية ، وحقن الجراثيم ، والكهربا ،
حاجات تشيب يا بنتى تشيب .
- سميرة** : والعمل يا عمى .
- حسنيين** : أنا غلبت معاه يا بنتى ، مايسمعش الكلام أبدا ، مين
عارف ما يمكن يسمع كلامك .
- سميرة** : يعنى أعمل ايه يا عمى .
- حسنيين** : مش هو القائد يا بنتى ، ما يقعد هنا وبلاش نط لحد
ربنا ما يفوتها على خير . والا يروح مصر ويشوف
حاله ..
- سميرة** : (تعض اصبعها ولا تتكلم)
- حسنيين** : أنا عارف انه يبجك قوى ، وانت كمان بتحببه ، دا ياما
كلمنى عنك .
- سميرة** : صحيح يا عمى ، قصدى أقول ..
- حسنيين** : ولا تقولى ولا تعيدى ، أنا نهار المنى يوم مافرح بيكو ،
واشيل عيالكو ..
- (يدخل نسر الفراش يحمل على كتفه بندقية)
- حسنيين** : دا ايه دا راخر ، نسر ، انت كمان بقيت فدائى .
- نسر** : همه اللي عينونى غفير على مخزن السلاح .
- حسنيين** : وايه دى اللي انت شانطها فى رقبتك ..
- نسر** : بندقية ..
- حسنيين** : طيب وداخل هنا ليه ، هوه أنا مخزن السلاح اللي انت
غفير عليه .

- نسر : لا بس الخواجا بنايوتى بره عاوزك .
- حسنيين : قوللو مش هنا .
- نسر : مانا قتلو انت هنا .
- حسنيين : ناصح يا سيدى ، روح انجر هاتو .
- نسر : حاضر (يخرج) .
- حسنيين : انخلى انت يا قمورة .

(تنصرف ويدخل بنايوتى)

- بنايوتى : سعيدة حسنيين بيه أنا جى كلمتو ثلاثة كلمة . .
- حسنيين : ولا كلمة ، فلوسك وعلى عينى وراسى ، پس دأمش وقته ، آدى انت شايف بنفسك ، الحال واقف من كل ناحية .
- بنايوتى : أنا حسنيين بيه والله .
- حسنيين : يعنى اعملك ايه ، اقلع نفسى .
- بنايوتى : يعنى انا كمان يعمل ايه حسنيين بيه .
- حسنيين : تصبير شوية . .
- بنايوتى : شوية دى أد ايه ؟
- حسنيين : أهو دا بقى اللى معروفوش ، تصبر لحد ربنا ما يفرجها .
- بنايوتى : وامتى هود راح يفرجها . .
- حسنيين : بكره الحال يروق ويصلح ، وفلوسك فى امان ، هو احنا طرنا .
- بنايوتى : أنا اللى عاوز يطير ، عاوز يرجع مائله تانى . أنا تعبان كثير حسنيين بيه .
- حسنيين : خلاص فلوسك وعلى عينى وراسى ، بس مش دلوقت ، انت مش شايف المدافع وراك .
- بنايوتى : (مدعورا) فين مدافع دى .

حسنيين : اهى الدنيا كلها بقت مدافع ، أصبر على رزقك شويه ،
حد عارف بكره يحصل ايه •

بنايوتى : يعنى وبعدين خسنيين بيه •

حسنيين : يومين ثلاثة ، كل شىء راح يصلح •

بنايوتى : انا راح يجى بعد يومين ثلاثة ، بس دى ببقى آخر مرة
خسنيين بيه ، آخر مرة •

حسنيين : ماشى •• ربك يسهل يا بنايوتى •

(يخرج بنايوتى يصطدم باسماعيل داخلا بترنح يتلوه
بببرات مرتعشة)

اسماعيل : فإوض فخلك أمة قد أقسمت ، الا تنام وفى البلاد دخيل،
الله ، دافى الديار دخيل فعلا ، أنت بتعمل ايه يا بنايوتى •

بنايوتى : ايه دى ، انت مبسوط ، دايمًا مبسوط ، ايه دى •

اسماعيل : دانا مبسوط خالص ، وبكره ياما هتنبسط •

بنايوتى : دى ايه دى (ينصرف مهرولا) •

اسماعيل : (لحسنيين) بنايوتى جى يكافح راخر والا ايه ؟ •

حسنيين : لا جى يسكر زى بعضهم •

اسماعيل : بعضهم دا مين •

(يدخل ممدوح مهرولا)

ممدوح : مساء الخير يا بابا ، مساء الخير يا عمى •

حسنيين : أهلا ممدوح ، ائت فين يابنى م الصبح بدور عليك •

ممدوح : كنا عند الأربعين يا بابا •

حسنيين : طيب على كل حال عندى ليك خبر مهم قوى ، احنا كونا
لجنة عليا للاشراف على حركة المقاومة فى المدينة واللجنة
انتخبنتى رئيسا لها •

ممدوح : دا كلام عظيم يا بابا وخطوة كويسة •

اسماعيل : والعليا دى فيها بنايوتى •

حسنيين : (متجاهلا كلام اسماعيل) واللجنة دى فيها على بيه حمزه
سيد بك ابراهيم ، والرئيس سعد الله •

- اسماعيل : (ينهض واقفا) يا خرابى يبقى الانجليز مش طالعين -
 ممدوح : انا شخصيا ماعنديش مانع اتعاون مع اللجنة دى
 اسماعيل : انا شخصيا مش معاكو ، انا فدائى لوحدى . دى لجنة
 عليا للمواسير .

(ينهض وينصرف الى الخارج فيدخل القلش)

- القلش : يا الف تلتيمت مرحب ياسى ممدوح .
 ممدوح : اهدا بالمعلم القلش (لوالده) دا المعلم القلش راجل عظيم
 يا بابا .
 حسنين : دا كنز يابنى ، كنز . عن اذنكو انا رايح احط رجله فى
 ميه سخنة .
 (ينصرف)

- ممدوح : انت عرفت التعليمات يا معلم ؟
 القلش : اهدا - كل شىء واللى خلقك .
 ممدوح : يعنى عرفت موقع المعسكر ، وهتخس منين ، وهتهجم
 منين ! .
 القلش : دا انا عارف الكامب زى الوده دى من غير مؤاخذه ١٢
 سنة وانا شغال جوه واللى خلقك .
 ممدوح : (ضاحكا) دا انت على كده دكتوراه فى الانجليز .
 القلش : ولا دكتوراه ولا حاجة ، انا من غير مؤاخذه كنت ميكانيكى
 دبابات .

ممدوح : (ضاحكا) ميكانيكى دبابات !؟

القلش : آى كده واللى خلقك ، خدناها شطارة وفهلوة
 وتفتيح عين .

- ممدوح : وانت تعلمت ميكانيكا الدبابات فين ، عندهم ؟
 القلش : دبابات ايه اللى هتعلمها ، انا كنت تاجر فواكه معتبر
 قبل الحرب .

ممدوح : وسبت الفواكه واشتغلت فى الدبابات .

القلش : اسم الله عليك .

- ممدوح : عيادات آيه دى .
- القلش : عيادات شيليان م اللى قلبك يحبها .
- ممدوح : دانت حاجة عظيمة قوى يامعلم قلش .
- القلش : تشكر يا امير . الوقت احنا هنهجم م اليمين ، ورجالتك
من ع الشمال .
- ممدوح : مظبوط كده .
- القلش : الله م صلى ع النبى ، بس المواسير مش ع اليمين .
- ممدوح : مواسير آيه .
- القلش : أستغفر الله العظيم ، الواحد من غير مؤاخذه عقله مش
فيه ، الغرض استأجز انا ، هاخذ رجالتى واطلع ع
المعسكر .
- ممدوح : مع السلامة يا معلم ، ربنا معاك .
- القلش : ربنا مع الكل ، سلامو عليكو .
- (يتصرف القلش ويبقى ممدوح وحده مشغولاً بالكتابة ،
يدخل عليه البرنس)
- البرنس : سلامو عليكو يافندى .
- ممدوح : سلام ورحمة الله وبركاته ، آيوه .
- البرنس : آمال المعلم القلش فين .
- ممدوح : دا خرج دلوقت .
- البرنس : خرج مشوار ، والا طلوعوا الجبل يعنى .
- ممدوح : لأ طلوعوا الجبل ، أى خدمة .
- البرنس : هو مين رئيس المكتب هنا ؟
- ممدوح : اتفضل يا معلم ، اتفضل اقعد ، أى خدمة اقدمها لك .
- البرنس : مافيش فايده ، قلنا نطلع مع الرجاله وبس .
- ممدوح : أهلا وسهلا .
- البرنس : يا الف أهلا يافندى ، بينى وبينك القلش فضل يزن على
دماغى تعالى اطلع معنا ، تعالى اشتغل معنا ، انما

بيني وبينك بقى ، أنا كنت كاشش ، مش جبن وحياتك ،
انما يعنى .

ممدوح : مفهوم مفهوم ، الواحد فعلا ، أحيانا يشوف ان التريث
أحسن ..

البرنس : بينى وبينك ولا تريس ولا نيلة ، ماهو الريس زى النفر ،
هوه فيه حد يفضل .

ممدوح : انشاء الله كلنا هنفضل .

البرنس : يا عم قول يا باسط ، دى شغلة كلها مصايب .

ممدوح : بالعكس يا معلم . احنا اقوى واعظم ، دى بلدنا ومعه
غرب هنا ، همه معاهم سلاح واحنا معانا سلاح ، همه
ماعندهومش ايمان ، واحنا عندنا ايمان همه بيحاربوا لأن
الأوامر كده ، واحنا بنحارب لأن دى حاجتنا ولازم
نستردها .

البرنس : الله الله .. انت تنفع فى السيمى ، والا تنفع أبوكاتو ،
ودينى انت خسارة فى الشغلة دى !

ممدوح : أبدا يا معلم ، كلنا كبير وصغير غنى وفقير لازمين
للمعلية دى .

البرنس : ودينى كلامك حلو ، وزين !! دا لو رجالة الريس سعد الله
سمعوا الكلام ده ليسيبوه وينضمولنا .

ممدوح : مش مهم ينضمولنا ، ما دام الهدف واحد ، مش مهم أى
حاجة بعد كده !

البرنس : فعلا مش مهم ، المهم دلوقت انتو شغلكر ازاى ؟

ممدوح : دى حاجات ماتنقلش كده .

البرنس : مش قصدى ع المعاملة ، أنا عارف كل حاجة ، القلش
مفهمنى كافة شئ ، أنا قصدى متطلعو امتى ، كام طلعة فى
الأسبوع هتهجم جنب السويس والا بعيد شوية ؟

ممدوح : برضه دى حاجات بنقررهما فى وقتها ، انت عارف ان احنا
مش جيش ، دى حرب عصابات .

البرنس : عارف .

ممدوح : يعنى احنا بنضع الخطط حسب الواقع .

- البرنس : واكع ايه ياخويا . ما الجبل ملغم اشكال والوان .
- ممدوح : ايوه ملغم صحيح ، انما احنا لازم نختار .
- البرنس : منختار ايه . ما هو كل اللي فى الجبل صنف واحد ، من
نهار ما نشأت الشغلة دى ، وكل الوارد صنف واحد .
- ممدوح : على كل حال المسائل دى ، هنبقى نتكلم فيها بعدين ، المهم
بلوقت ، انت عارف الشغلة دى اخطارها ايه .
- البرنس : الا عارفها ، دا انا عاجنها وخابزها ..
- ممدوح : يعنى عارف طبعاً ، ان - لا سمح الله - فيها موت ، وفيها
اسر ، وفيها ..
- البرنس : هيكون فيها ايه يعنى ، ما هو احسن م اللي احنا فيه .
- ممدوح : انا الحقيقة معجب بالروح دى ، وباذن الله الوطن هيعترف
لكم بالمجميل ده .
- البرنس : اتفقنا .
- ممدوح : (يقدم له دفترًا) طيب والله تكتب لنا اسمك وعنوانك منا
- البرنس : الحمد لله ، ليعرف اقرا ولا اكتب ، اكتب انت .
- ممدوح : طيب يا معلم . الاسم والله .
- البرنس : البرنس السيد احمد ، حارة القسم بالاربعين .
- ممدوح : طيب عال يا معلم ، سيب معنا بقى تحقيق الشخصية .
- البرنس : تحقيق الشخصية . عشان ايه دا كله .
- ممدوح : دا اجراء لايد منه .
- البرنس : مامعيش ..
- ممدوح : طيب رخصة ، كرنيه ، اى حاجة يعنى .
- البرنس : عشان ايه دا كله ، هوه انا ما اشتغل قنصل .
- ممدوح : دا اجراء متبع عندنا ، كل واحد فى الكتيبة لازم يسبب
رخصة او تحقيق شخصية ، لازم .
- البرنس : وايه اللي خلاه لازم يعنى .
- ممدوح : عشان افرض حصل حاجة لاسمح الله .
- البرنس : هيحصل ايه يعنى ، مش نموت ، فى ستين داهية ، ابقى
ارمىنى فى اى مجرور .

ممدوح : دا اجراء لابد منه ، ما دام عاوز تشترك معانا في العمليات

البرنس : عمليات ، هيه السرقة اسمها عمليات ، بكاترة احنا !!

ممدوح : سرقة ايه يا معلم ؟

البرنس : لا ، استغفر الله ، هنصلى ، آل سرقة ايه ، انت فاهمنى
مباحث .

ممدوح : مباحث ايه وبتاع ايه ، انت بتتكلم بتقول ايه .

البرنس : مش عارف بقول ايه ، خش في عبي خش . آل عمليات آل
أكونش غلط وجيت المستشفى الاميرى .

ممدوح : لا ، انت يظهر عليك مسطول .

البرنس : انا لسه مسطلتش ، واوعى تلبخ معايا بقولك ، هتكون ايه
انت يعنى . وكيل لحسنين بيه . وانا للبرنس احسن
شبيح في البلد دى .

ممدوح : طيب ارجوك ماتزعقش ، واتفضل اخرج من هنا .

البرنس : اخرج من هنا ، لا هو انا جى اشدت ، حلوة دى ، آل ايه .
هات الرخصة ، هاشتغل حرامى برخصة !! هتسرق .
وكمان عاوز رخصة .

ممدوح : احنا هنا مش حرامية يا معلم ، احنا فداثيين .

البرنس : هاو ، حلوة فداثيين دى . طب خدونا معاكر فداثيين ، والا
حرام ناكل عيش معاكر .

ممدوح : انت يظهر غلط فى العنوان يا معلم .

البرنس : انا مغلطش ولا حاجة ، مش ده مكتب حسنين بيه ، والقلش
بيشتغل هنا ، والمواسير بيتجى على هنا ، والهيش هنا ،
والخطف هنا . انا مش مختوم على قفاى .

(يدخل حسنين بيه على الضجة)

حسنين : ايه يا ممدوح ، ايه الحكاية .

ممدوح : مش عارف يا بابا ، المعلم يظهر مبسوط شوية .

حسنين : (للبرنس) أيوه يا معلم ، اى خدمة .

البرنس : احنا خدامينك يا حسنين بيه ، لفتدى بتكلم معاه م الصبح
مش فاهمنى ، باكلم لوندى .

- حسنيين : أيوه أي خدمة ، أي خدمة يا معلم •
- البرفس : عاوزين نطلع مع الرجالة •
- حسنيين : طب وماله (يشير لممدوح اشارات تعنى ان الرجل مجنون)
أي خدمة يا معلم ••
- البرفس : يعنى موافق !
- حسنيين : امال ، انا ليه بركة غيرك ••
- البرفس : يعنى نطلع من بكره ••
- حسنيين : مافيش مانع •
- البرفس : طب قوت حاجة •
- حسنيين : (يبحث فى جيوبه) اتفضل ، اتفضل (يناوله نقودا)
- البرفس : تشكر يا ملك (وهو يهم بالانصراف) ابقى فهم لفندى بتاعك
احسن دا بينه خام قوى • (ينصرف)
- حسنيين : هو الواحد هيلاقياها منين ولا منين ••
- ممدوح : دا راجل غريب قوى يا بابا •
- حسنيين : دا راجل مجنون يابنى ومعروف فى كل حطة •
- ممدوح : دا فاهم اننا بنسرق ، وينخطف ، وعمال يتكلم على مواسير ،
وشبيحة •
- حسنيين : مجنون يابنى مجنون •• الله يساعده
- (يدخل البرفس مرة اخرى)
- البرفس : وهنطلع الساعة كام باذن الله •
- ممدوح : الساعة عشرة •
- البرفس : عشرة بريفكس يعنى •
- ممدوح : أيوه بريفكس يعنى •
- البرفس : الله ، يعنى فهمت الدور ايه •
- ممدوح : مانا فاهم بس كنت باضحك معاك •
- البرفس : أيوه فتح عينك امال ، دانا البرفس ال •
- (ينصرف البرفس ويضحك ممدوح)

- ممدوح** : دا حكايته حكاية ، صحيح كل واحد فى سوق •
- حسنيين** : ملك يابنى منظمة سيدك ، ملك !• آمال القلش راح فين
- ممدوح** : خرج يشترك فى عملية كبيرة النهاردة •
- حسنيين** : ربنا يوفقكم يابنى •
- ممدوح** : تعرف يابابا ، أنا مطمئن جدا اللي القلش مع الكتبية •
- حسنيين** : موه راح لوحده ؟
- ممدوح** : لا خد رجالته معاه ، يظهر انهم ناس فدائيين بصحيح •
- حسنيين** : ايوه يابنى دول دارسين الجبل حته حته ، وقلوبهم ميتة
زى الحديد •
- ممدوح** : يا سلام يابابا ، أنا ماكنتش فاهم ان الشعب ده فيه خامات
عظيمة زى كده • واحد زى القلش ده ، وأنت معاه تدس
بالثقة ، وتشعر بالتفاؤل •
- حسنيين** : قوى قوى يابنى • وياما ناس يابنى !
- ممدوح** : صحيح الشعب كنز •
- حسنيين** : من حق يابنى ، الله يخيبه الجدد ده اللي كان هنا دلوقت ،
نسانى اللي كنت عاوز أقوله ، ايوه ، انا كنت عاوز
استشيرك فى موضوع كده •
- ممدوح** : ايوه يا بابا •
- حسنيين** : انا يابنى تعبان ، مابقاش فيه حيل حتى أقوم من مطرحى ،
وكان نفسى أفرح بيبك قبل ما يحصل حاجة •
- ممدوح** : مافيش حاجة متحصل أبدا يابابا •
- حسنيين** : ماحدش عارف يابنى ، الأعمار بيد الله •
- ممدوح** : بس انا شأيف ان ده مش وقته •
- حسنيين** : ايوه يابنى مش وقته • بس يعنى كنا حنتكلم وبعدين بيدى
على مهلنا ، أنت عارف ان بنت الرئيس سعد الله ••
- ممدوح** : انا يا بابا قلت لك ميت مرة بلاش السيرة دى ، ثم انا لمسه
فاضل على كتير عشان اتجوز ، انا متجوز قبل ما تخرج؟
- حسنيين** : نتكلم بس يابنى ، والجواز على مهلنا •

- ممدوح** : انا شخصيا مش عاوز اشغل نفسى بحاجة .
- حسنيين** : يابنى دا عندها ٥٠٠ فدان حتة واحدة .
- ممدوح** : بس انا مش عاوز اتجوز يابايا .
- حسنيين** : وحد قلك اتجوز يابنى ، ابقى اتجوز على مهلك .
- ممدوح** : برضه انا مش موافق على الكلام ، لما احب اتجوز هقولك يا بابا .
- حسنيين** : انت حر يابنى ، انت حر .
- ممدوح** : وبالمناسبة دى يابايا ، احنا كنا عاوزين ٢٠٠ جنيه .
- حسنيين** : ٢٠٠ جنيه عشان ايه يابنى .
- ممدوح** : فيه كتيبة تانية هتوصل بكرة ، وعاوزين مبلغ ندبر لهم امكنة وملابس .
- حسنيين** : وكتيبة تانية لزومها ايه ، هيه يعنى السويس ناقصة كتايب
- ممدوح** : مافيش حاجة متخسر يا بابا .
- حسنيين** : وانا محبيب فلوس منين دلوقت ، اعيان البلد ومش عاوزين يدفعوا . وانا غرقان لشوشتى . المدينة الهباب دى كلقتنى الجلد والسقوط .
- ممدوح** : دا احنا عاوزين ميتين جنيه كل الحكاية .
- حسنيين** : وهمه ٢٠٠ جنيه شوية فى الزمن ده ، الحال ماهو واقف من كل ناحية ، والجنيه النهارده بقى بالبطاقة ، انا حاطط ٢٥٠ الف جنيه فى المدينة ، شحنتنى ، دا لولا الغيب كان الواحد وقف فى الشارع يصرخ .
- ممدوح** : طيب يابايا ، على كل حال ممكن نتصرف احنا .
- حسنيين** : ثم انا مش فاهم ايه لازمة القداثيين دول همه رجالة السويس قليلين . ما عندك رجالة القلش ، الواحد فيهم يشتغل بخمسين عيل م اللى انت جاييهم دول ، وكل واحد فيهم مربيلى قصة .
- ممدوح** : دول مش عيال يابايا ، دول شباب ورجالة .
- حسنيين** : (يتهادى على الكرسي) ماتاخذنيش يابنى ، انا باتكلم من غلبى ، الروماتيزم يابنى بيهرى فى جنتى ، وقلبى ، قلبى زى ما تكون سكينه بتدبحه من جوه .

- ممدوح** : انت مش بتتعالج يا بابا .
- حسنيين** : مفيش فائدة يابنى ، كل شيء خسر الايام دى ، حتى الدواء والدكاترة .
- ممدوح** : بالعكس يا بابا دا كل شيء اتقدم ، خصوصا الطب والدوا .
- حسنيين** : اللى ايده فى المية ، مش زى اللى ايده فى النار ، انا داخل استريح يابنى (ينهض وينصرف) آخر زمن ، ربنا يحسن آخرتنا ويفوتها على خير .
- ممدوح** : (يقترب من المكتب وينقر عليه بأصابعه) بس الواحد يجيب فلوس منين .

(تدخل زوجة حسنيين)

- حسنية** : ممدوح .
- ممدوح** : أيوه يا طنط .
- حسنية** : امال زمايك فين يابنى ؟
- ممدوح** : طلعا عملية فى الجبل .
- الأم** : مس ولا كلمة ، ربنا ينجيهم يابنى ، وأنت مرحتش معاهم؟
- ممدوح** : انا مستنى جماعة زمايلنا جاينين من مصر النهاردة .
- الأم** : ربنا يوصلهم بالسلامة (بعد فترة صمت) انا سامعاك وأنت بتطلب فلوس من أبوك يا ممدوح ، انتو ما معكوش فلوس يابنى .
- ممدوح** : مش مهم اهى تتدبر .
- حسنية** : أبوك مخنوق يا ممدوح ، والحال فى البلد واقف .
- ممدوح** : بكره تتعدل ، كل شيء هيبقى عال يا ماما .
- حسنية** : بكره امتى يابنى . دالانجليز فى الجبل شيء على بعضه ، هيه دى حاجة تخلص .
- ممدوح** : كل شيء ليه اوان ، بكره يخلصوا .
- حسنية** : ربنا يمسحهم يابنى (تضع يدها فى صدرها) من حق يا ممدوح ، انا معايا ٤٠ جنيه اهم ، خداهم يابنى يمكن ينفعوكو .

ممدوح : يا سلام يا طنط ، دول يسووا ٤٠ ألف ، (يتناول المبلغ) ،
عارفه بعد الجلاء ، هنعملك تمثال فى الشلوفة •

حسنية : هو انا انفع فى التماثيل يابنى ، ابقى اعمل لجدك •

ممدوح : يا سلام عليكى فى التمثال ، وانت لابسة الشال ده ، ويبقى
تمثال الأم المجهولة ، أيوه تمثال الأم المجهولة • • مانتى
زى امى ، بالعكس انتى امى فعلا انا مش فاكر امى
كويس ، انا من نهار ما عرفت الدنيا وانت اللى بترببى ،
زمان كنت باقولك يا ماما ودلوقت هقولك يا ماما برضه ،
وقولك بصراحة انا عمرى ما فهمت أبويا ولا هو فهمنى ،
الحاجة اللى اشوفها شمال يشوفها هوه يمين ، واللى
اشوفها يمين يشوفها هوه شمال ، انت الوحيدة اللى فى
البيت ده اللى كنت فاهمانى ها ايه رايك بقى فى تمثال
الأم المجهولة •

حسنية : وهتعلمنى مجهولة ليه يابنى؟! بقى دى آخرتها •

ممدوح : (يضحك) لا ياماما ، يبقى زى تمثال الجندى المجهول •

حسنية : ربنا ينصركو واللى زيكو يابنى •

ممدوح : هاتى بوسة يا ماما (ينحنى ليقبلها) الله ، انت بتعيطى
يا ماما •

حسنية : (وهى تمسح دموعها) لا يابنى ، انا مبيعطش ولا حاجة ••

ممدوح : بقى انت ، حفيدة القومندان ابراهيم طاهر بطل معركة التل
الكبير ، تعيطى ، دا يومك ، هناخد بتاره وتار زمايله ••

الأم : انا قلبى مقبوض يا ممدوح ، فرحانة وخايقة يابنى •

ممدوح : وهوه حد بيموت ناقص عمر يا ماما ، وهوه احنا مش زى
الانجليز ، ما هم شبان زينا ، وجايين من آخر بلاد ربنا
عشان يحاربونا هنا •

الأم : وهم دول ناس يابنى •• دول وحوش •

ممدوح : وعشان كده لازم نبقى وحوش زهم ، بقالنا ٧٠ سنة عاملين
فراخ ، ولما تيجى الفرصة نعيط •

الأم : (تمسح دموعها) •

ممدوح : طب اضحكى ، والنبنى تضحكى (الأم تبتمس) أيوه ، لا
قوى (الأم تضحك) أيوه كده ، هاتى بوسة بقى (يقبل يدها)
الله ، (الأم تستأنف البكاء) الله ، احنا هنعيط تانى •

الأم : (وهي تنهض وتنصرف) لا ، أنا مش بعيط، دا عيني وجعاني
يا ممدوح ، عيني وجعاني .

(تتفجر في البكاء وتدخل ، يجرى ممدوح خلفها ، تدخل
امراة ترتدى ملابحة لف ، ومعها ثلاثة اطفال)

المراة : انت يا بنى ، مكتب حسنين بيه ده . .

ممدوح : ايوه يا ست ، اى خدمة .

المراة : مش اللى ينقرص فى بطنه القلش بيشتغل معاكو هنا .

ممدوح : ايوه يا ستى .

المراة : والنبنى ياخويا اوعدوا تدولوا المكافاة .

ممدوح : المكافاة !

المراة : ايوه ياخويا ، دا حالف ياخدها ويتجوز واحدة تانية ، آل

اسمها زينب آل .

ممدوح : زينب ، زينب دى ايه ؟

(تدخل زينب تتقصع)

زينب : ايوه يا سيدى ، خدامتك .

ممدوح : (لزينب) تعرفى الست دى .

زينب : ايوه يا هانم ، فيه اى خدمة ؟

المراة : أنا يا اختى مرات القلش .

زينب : مرات القلش . هو بيبقى جوزك .

المراة : ايوه ياختى ، وحالف ياخذ المكافاة ويجوز على . .

زينب : يجوز عليكى ، اللى ينقرص من باطه .

المراة : ست عيال وأنا السابعة ياختى وعاوز يرمينا آل عشان

يتجوز ، دا مين العامية اللى هتجوزوا .

زينب : دا يا ستى بيحلف انه مش متجوز .

المراة : حلفان لما ياكلو ، آه يا نارى بس لو اشفو اللى هيتجوزها

دى . المصدى الملضى .

زينب : وهيه مين دى اللى ترضى تجوزه ؟

المرأة : وماتتجوزوش ليه يا حبيبتي • مش راجل ملو هدومه •
والنبي يابني ماتدوله المكافاة ، حاكم ده مجنون • وشغلة
المواسير دى جنتته زيادة •

ممدوح : (لزيق) مكافاة ايه ، هوه ليه مكافاة عند بابا •

المرأة : أيوه يا خويا ، ما هو متفق مع البيه ، الطلعة بجنيه ، وان
- البعيد - جراه حاجة عياله تاخد ميه ، فلوس الأيتسام
عاوز ياخدها يتجوز بيها • منك لله يا قلش ، هوه راح فين
يابني ؟

ممدوح : راح مشوار يا ست وجاى •

المرأة : والنبي لقعده بره مستنياه ، والنبي لفضحاء فى كل حته
(تتصرف للخارج)

زينب : (تحدث نفسها) بقى متجوز ياقلش الكلب •

ممدوح : الله ، هوه انت زينب اللي ••

زينب : أنا ، فشر ، طيب هوه أنا ارضى ••

ممدوح : ليه ماهو راجل ملو هدومه ••

زينب : هدومه ، دى كلها قمل ، والنبي انا ما يملى عينى عشرة زيه

ممدوح : طيب اجرى اعملى كوابية شاي •

زينب : من عينى يا سيدى •

ممدوح : والا أقولك ، بلاش دلوقت ، انا خارج رايح مشوار وجى
•• حالا

زينب : تروح وتيجى بالسلامة يا سيدى •

(يسمع صوت زوجة القلش فى الخارج)

الزوجة : والنبي ان سبته ، انا قتيلته النهاردة •

(يدخل نسر الى المسرح حاملا بندقية يقطع المسرح فى

خطوات عسكرية ، تدخل الزوجة قادمة من الداخل)

حسنية : ايه الخوته دى ، (تنظر بدهشة لنسر) ده مين ده (لنسر) ،

انت •• انت بقيت فدائى انت راجر •

نسر : الله ، ست هانم ، ازيك ياست ، هو تسالى يا ست هانم
تسالى ••

حسنية : أما منظرک يضحك بصحيح يا نسر •

نسر : حتمعل ايه ياست هاتم ، اهو لتنا نعمل اى حاجة ، **لؤلؤه**
عجز مابقاش فيه حيل يعمل حاجة ، ايام الثوراة كان
الواحد شباب *

زوجة القلش : وسيدى الغريب لانضحه ، عشر سنين ياخواتى ، ويعدين
عاوز يرمينا فى السكك *

حسنية : الله دا ايه دا اللى بره ؟

نسر : دى مرات القلش *

حسنية : مرات القلش مالها ؟

نسر : عاوز يجوز عليها آل

حسنية : يتجوز !!

نسر : انا عارف ، والله مانى قاهم حاجة ياست *

الزوجة : (من الخارج) وسيدى النبى ماسيباه ، بقى عاوز ياخذ
المكافاة !!

حسنية : طيب مش تقولها تتفضل جوه يانسر *

نسر : هتفضل، فين ، دا معاهما ست عيال نازلين تنطيط تقوليش
قرود *

حسنية : ربنا يخلى ، يا عينى ع الولايا *

نسر : بقى دى ولايا دى اللى لسانها نازل يفرقع زى المسدس ، آل

يا عينى ع الولايا آل * يا عينى ع الفدائين *

(يشير الى نفسه)

زوجة القلش : وراس سيدى النبى لفضحاه فى كل حته ، عاوز ياخذ
المكافاة !!

نسر : انت لسه متفضحيه ، دا الانجليز زمانهم خدو خبر *

حسنية : ماتروح يا نسر تهديها *

نسر : انا اهدى دى ، دا انا اهدى الانجليز ولا اهديهاش *

زوجة القلش : وشرف النبى ان عملها لاشرب من نمه *

نسر : ياريتيه ياست يعملها ياريتيه *

(يدخل اسماعيل فجأة يترنح ، يرتدى فوق زيه العادى

كاب على رأس جترال انجليزى)

اسماعيل : دا مين دا اللى ياريتيه ياخويا *

نسر : الله اسماعيل بيه ، دا ايه ده اللى انت عامله فى نفسك ده

- اسماعيل : ايه عجيبة ، ماشفتش جنرالات قبل كده •
- نسر : (يضحك) جنرال ، جنرال ياسماعيل بيه مرة واحدة •
- اسماعيل : (وهو يهم بالجلوس فيلمح زوجة اخيه) الله ، انت هنا •
- حسنية : انت جاي منين دلوقت ؟
- اسماعيل : لغيت الدنيا ، م الأربعين لكفر شارل ، لكفر عبده ، لعزبة بنايوتى • فاحلفت ، محلفش أبدا •
- حسنية : ودا كله علشان ايه ؟
- اسماعيل : عشان ايه ازاي ، لازم نرفع الروح المعنوية ، الناس دى زى اليه اللى حايشاها القناطر ، عاوزه واحد بس يفتح القناطر ، تبص تلاقهم بقوا زى السيل انا ايام الثورة كنت مهندس قناطر افتح العيون أبص الاقى الناس بقت زى الشلال ، فاكر يا نسر ؟
- نسر : فاكر والله يا اسماعيل بيه •
- اسماعيل : فاكر يوم الأزهر ، يا سلام على يوم الأزهر ، فى اليوم ده زوجة القلش : (من الخارج) وسيدى النبى لارقع بالصوت وافضحه •
- اسماعيل : دا مين ده اللى عامل هوسة بره •
- نسر : دا شلال بره انفتح •
- حسنية : دا اللى يدور عليك يلايك ماتغديتش يا اسماعيل •
- اسماعيل : آه ، صحيح ، المشاغل بتنس الواحد الحاجات دى ، انا ايام الثورة ماكنتش أكل باليومين ، فاكر يا نسر ؟
- نسر : والله فاكر يا اسماعيل بيه ••
- حسنية : طيب لما أروح أحضرلك لقمة •
(تتصرف الزوجة الى الداخل)
- نسر : (يتقدم خطوة من اسماعيل) انما دا ايه الحاجات دى كلها •
- اسماعيل : (ينظر اليه باحتقار) انت بتكلمنى ؟
- نسر : امال بكلم نفسى •
- اسماعيل : بيقى لازم تعظمنى ، يا •• نفر •
- نسر : نفر ، دا فى حرب ١٤ كنت نفر ، لو فضلت لحد النهارده كنت بقيت صاجن •
- اسماعيل : طيب ياباش صاجن ، برضه عظمنى •

- نسر : ومعظمك احنا يعنى فى الحرب •
اسماعيل : امال انت ماسك البندقية دى ليه ؟
نسر : انا واقف خدمة على مخزن السلاح •
اسماعيل : ومين اللى امرك تقف ؟
نسر : ممدوح •
اسماعيل : وراح فين ممدوح ؟
نسر : خرج بره •
زوجة القلش : الهى تتشك فى دراعك ياقلش يابن هدية •
اسماعيل : دا ايه دا اللى ابن هدية •
نسر : جوزها ، بتدعيه ربنا يسهله ويفتحها فى وشه ، ويرزقه
بشغل فى دراعه •
(تدخل زينب تتقصع تحمل صينية صغيرة عليها بعض
الاطباق لاسماعيل)
نسر : الله ، انت جايه الاكل للقائد ؟
زينب : احنا لينا بركة غير القائد ، هوه ماحدث رجوع الرجاله
والا ايه ؟
زوجة القلش : الهى لا ترجع ولا تشرب لها ميه ياقلش يابن حوا وآدم •
زينب : هيه الست لسه هنا •
نسر : وهتروح فين وراها حاجة •
زينب : (كاتها تتحدث لنفسها) بقى القلش متجوز وعنده ست عيال •
نسر : ومين عارف ياما فى الجراب يا حاوى •
زينب : هوه مارجيش •
نسر : وهوه حيرجع النهارده ، ودا لمو شافها هنا مش هيبوب
الناحية دى دا يحارب اورطة بحالها ، ويشوف مراته
ينخرع •
زينب : دا بس عمللى راجل •
اسماعيل : حد عارف الراجل من المرة دلوقت ، ما كله زى بعضه •
ايام الثورة كان الرجاله معروفه والحريم معروفه كانوا
يخرجوا لابسين يشمك ابيض زى الفل فاكر يا نسر •
نسر : والله فاكر ياسماعيل بيه •

زينب : (وهي تتصرف) والنبي ان جه القلش ابقى اندهلى يا نسر .
اما هيبقى منظر .

اسماعيل : هره انتو شفته مناظر ، دى ايام الثورة كانت مناظر على
قفا مين يشيل ، فاكر يا . صاجن .

نسر : والله فاكر يا حضرة القائد .
(يدخل ممدوح فجأة)

ممدوح : (وهو ينظر نحو عمه) الله هره حضر للقائد هنا ؟

اسماعيل : (وهو مشغول بالاكل) امال يابنى هاروح فين ، مونتجمرى
كان قاعد فى شبرد ، انما انا زى بعضه على اد الحال :

ممدوح : امال بابا فين ؟

اسماعيل : والله مانى عارف يابنى يا ممدوح ، يمكن جوه .

ممدوح : طيب اما اخش اشوفه كده .

اسماعيل : (يهب واقفا) لا استنا انا عاوزك لوحسك (لنسر) انصرف

نسر : (وهو ينصرف) انصرفنا يا قائد .

زوجة القلش : الهى ينتقم منك يا قلش يابن هدية .

ممدوح : الست دى لسه مابطلتش (لعمه) ايه الحكااية يا عمى ،
عاوزنى ليه ، اياك ناوى تسيب القيادة ؟

اسماعيل : لا يابنى ، انا عاوزك فى حاجة مهمة قوى ، حاجة جد قوى

ممدوح : اتفضل يا عمى .

اسماعيل : بش قبل ما تفضل يابنى ، احب اقولك حاجة ، انا سكران

صحيح انما الكلام اللى حقوله ، لازم تسمعه .

ممدوح : سامعك كويس يا عمى .

زوجة القلش : (من الخارج) الهى تسمع الرعد فى ودانك ماتسمع الكلام
يا واد .

اسماعيل : الكلام اللى حقوله يابنى ، كلام يزعل ، ويتعب ويعكنن ،
انما . . انما كلام مظبوط خالص ، مظبوط وحياة شبابك .

ممدوح : ايوه يا عمى ، انا سامعك خالص .

اسماعيل : انا عاوز اقولك يعنى ، تاخذ بالك .

ممدوح : هره انا عيل صغير يا عمى خايف على .

اسماعيل : لا انا قصدى تاخذ بالك م القلش ..
ممدوح : دا القلش بطل يا عمى ، ومعاه رجالة زى الأسود ، يا سلام
دا لو فيه عشرة من القلش .

(تقتحم المكتب زوجة القلش ثائرة)

زوجة القلش : هوه جه يابنى .
اسماعيل : (فى ثورة) هوه ايه اللي جه دى .
زوجة القلش : القلش يا سيدى .
اسماعيل : وهيجى منين ، هينزل م السما ، مانث مرابطة ع الباب .
زوجة القلش : أمال اعمل ايه بس يا سيدى ، والنبي ماتدولوا المكافاة
آل عاوز ياخذها ويتجوز .
اسماعيل : مكافاة ايه يا ست ، احنا مابنديش مكافآت ..
زوجة القلش : مابنديش مكافآت . دا متفق على فيه .

اسماعيل : قصدى مش احنا اللي بندى ، حسنين بيه هوه اللي عارف
الشغل ده .

زوجة القلش : أمال انت اسم النبي على مقامك مش حسنين بيه .

ممدوح : لا يا ست ، دا اسماعيل بيه .

زوجة القلش : تعيش يابنى وتفرح . أمال حسنين بيه فين .

اسماعيل : زمانه جى ، استنيه ع الباب راخر .

زوجة القلش : (وهى تخرج) والنبي ماني منقولة النهاردة .

اسماعيل : ياباى ، دى مش حرمة ، دى قاذفة لهب ، اسمع يابنى ..
خد بالك والسلام .

ممدوح : لا ، دا انت يظهر مبسوط قوى .

اسماعيل : والنبي مانا مبسوط يا ممدوح ، دانا زعلان قوى . المهم
خد بالك ، خد بالك يابنى .

(يتجه نحو الخارج ، يرتفع صوت زوجة القلش)

زوجة القلش : (من الخارج) الهى تروح ماترجع ياقلش يابن هدية .

ممدوح : (يقف وحده وسط المسرح) خد بالك .. آخد بالى من ايه ؟
(يهز رأسه) مسكين عمى ، ياخسارة ..

(تدخل سميرة على أطراف أصابعها)

سميرة : ممدوح ..

ممدوح : مين سميرة ..

سميرة : أيوه سميرة يا خاين ..

ممدوح : ياه ، خاين مرة واحدة .

سميرة : أيوه خاين ، تعرف تقوللى كنت فين طول النهار .

ممدوح : شوفى يا ستى ، بصفتك القائد بتاعى ، أحب أقدملك التقرير ده . الجماعة خرجوا م الصبح فى عملية مهمة قرى . وأنا طول النهار زى (الفرخة الداخنة) من بور توفيق للأربعين ، وم الأربعين للمحافظة ، ومن المحافظة للمينا ، ومن المينا لهننا .

سميرة : وأنا ايه يهمنى م الكلام ده كله ، انت مابتحبنيش وبس .
ممدوح : مابحبكيش ، طيب أعمل ايه عشان تتأكدى من حبى .

سميرة : لو كنت بتحبنى صحيح ، كنت افكرت تقعد معايا خمس دقايق ، بقالك تلت تشهر بعيد عنى فى مصر ، وبعدين حضرتك رايح تشوفلى الأربعين والمحافظة والمينا .

ممدوح : ماهر أنا مشغول دلوقت ، عشان أفضالك ببعدين . أفضالك بصحيح .

سميرة : وان ماكنتش حتفضالى دلوقت ، أمالى هتفضى امتى ، لما تروح تحارب وتموت .

ممدوح : ولا هاموت ولا حاجة ، بالعكس ، أنا هاعمر واخلل وأبقى رزل ، وهانعيش مع بعض كثير ، وهازق منك .

سميرة : ليك حق صحيح تقول الكلام ده . مانت زهقان منى من دلوقت .

ممدوح : الله الله ، دانث عصبية قوى النهاردة .

سميرة : أنا مش عصبية يا ممدوح ، انت اللى بتهرب منى .

ممدوح : أهرب منك ، حلوة دى .

(يمسك بها) طب اسمعى ، بعد الحرب دى مباشرة حنتجوز بعض ، بس على شرط ، المهر لازم يكون ميت راس عسكري انجليزى .

سميرة : أنا خايقة لتكون راسك منهم .

ممدوح : بقى دا اسمه كلام ده ، بقى بدل ماتشجعيتى ، وتزودى فى مهرك شوية تقولى الكلام ده ، هو مش انت سمييرة

بنت اسماعيل اللى ضيع حياته فى الثورة .

سميرة : (ترتمى فى أحضانها) أنا يا ممدوح خايقة .

ممدوح : خايقة من ايه بس ؟

سميرة : خايفة لتموت *

ممدوح : ما قلتك مش هموت ، أحلفك انى مش هموت ، نا عمير
الشقى بقى ..

سميرة : (وهى تحتضنه بقوة) انا مش عارفة وأنا معاك باحس
احساس غريب جدا *

ممدوح : لازم بتحبى ..

سميرة : باحس بالثقة وبالأمان ، وأنا مع عمى باحس العكس ..

ممدوح : عمك عجز بقى ، ماتبقيش تقعدى مع عواجيز ..

(يدخل اسماعيل فجأة وهما على هذا الوضع ، ترتاع
سميرة ، وتترك ممدوح ، وتهتف مشدوهة)

سميرة : بابا *

اسماعيل : ايوه بابا ، امال مين ، ماما ..

سميرة : أصل ممدوح يا بابا ..

اسماعيل : عارف يا بنتى عارف ..

ممدوح : لامؤاخذة يا عمى ، انا هاضطر اسبيكو دلوقت عشان
الجماعة تأخروا قوى ، أما أروح انا اشوف ايه الحكاية *

زوجة القلش : (من الخارج) روح الهى لايكسبك *

اسماعيل : يا بابى ، هيه القناطر لسه مفتوحة ..

(ينصرف ممدوح ، ينظر اسماعيل لسميرة)

اسماعيل : (لسميرة) ايه .. انت مالك دبلانه كده *

سميرة : أبدا يا بابا *

اسماعيل : ، يبقى لازم بخرف بقى .. *

(يرتفع صوت حسنين من الداخل)

حسنيين : يا سميرة ، سميرة .. (يدخل الى المكتب) انت فين يا بنتى،
خشى شوقى طنط عاوزاكى ليه *

سميرة : حاضر يا عمى ..

(تنصرف)

حسنيين : (يجلس خلف المكتب وينظر الى أخيه) مرحب بالقائد ..

اسماعيل : (باشمئزاز) أهلا .. *

حسنيين : (مستهزئا) دا ايه اللي على دماغك دى .
اسماعيل : ماسورة ..

حسنيين : (يضحك ضحكة صفراء) مش ناقصك دلوقت غير جيش ،
وخريطة ، خريطة من ايامم .. اللي كنت واخدها تلف فيها
ازايز .. (يضحك نفس الضحكة) انا عازف كنت طالع
لمين (ينظر الى الصورة المعلقة فوق راسه) الله يرحمه
بقى ، صحيح خلف .

اسماعيل : ماخلفش ليه ، خلف نائب اذ الدنيا ، ورئيس اللجنة العليا !
حسنيين : مالها اللجنة العليا ، مش عاجباك .

اسماعيل : لا دى عاجبانى قوى . وخصوصا كتيبة القلش .
حسنيين : وماله القلش ، قاعد يسكر طول النهار ، عالم شغاله بتاكل
عيشها بعرق جبينها ، مش طول النهار سكرانه ياسى
اسماعيل لو كل الناس عملت زيك كده ، الدنيا تخلص ..

اسماعيل : ماتخلص يا اخى ، وفيها ايه لما تخلص .
حسنيين : ايوه وفيها ايه لما تخلص ، وانت هيهمك ايه ، ماننت مستريح
اربعة وعشرين قيراط .

اسماعيل : انا فعلا مستريح ، انت اللي تعبان .
حسنيين : انا تعبان عشان ابنى واعمر ، عشان اعمل حاجة للناس
الغلابة ، عشان افتح بيوت ناس ، وكمان عشان اجيب
ويسكى سعادتك تقرعوا ..

اسماعيل : اهى دى الحاجة الوحيدة اللي قلتها صح ، هو دا الشئ
الوحيد اللي بتجيبوا وتستفيد به الناس ، انما حكاية
ابنى واعمر دى . اسمحلى ، هيه المواسير اسمها ابنى
واعمر ..

حسنيين : شوف السكر عميك ازاي ، بتخرف ، بتقول كلام
مانتش قده ..

اسماعيل : انا مش سكران ولا حاجة ، انا فايق ٢٤ قيراط ، مابخرفش
ولا حاجة ، بقى انت فاتح بيوت ناس ..

(يلمح حسنيين نسر واقفا فى ركن الحجره ، ويكون قد
دخل اثناء النقاش)

حسنيين : (لنسر) ايه اللي موقفك عندك يا بجم ؟
نسر : لسه فاضل ساعة ع الميعاد .

حسنيين : انجر غور من قدامى *

نسر : يعنى اغور من قدامك ، وبكره عبد الملك أفندى يخصم ساعة منى *

حسنيين : امش انجر بقولك *

(يفر نسر مذعورا)

اسماعيل : (يضحك بهستيرية) أهو أنا باسكر عشان كده ، عشان ماخافش من عبد الملك أفندى ، مايشغلش عندك ، باسكر عندك بس *

حسنيين : أهو دا اللى انت شاطر فيه طول النهار قاعد تسكر ، وآخر المتمة واخذ الخريطة تلف فيها أزايز *

اسماعيل : أمال ماخدها اعمل بيها ايه .. انا شخصيا مش عاوز اعمر ، مش عاوز افتح بيوت ناس ، خليك انت المعمر ، خليك انت الفاتح ، كفاية فاتح واحد فى العيلة ، واحد فاتح (يشير لحسنين) وواحد سكرى (يشير لنفسه) أهو برضه فاتح *

حسنيين : بالذمة أنت مش مكسوف من نفسك *

اسماعيل : ومانكسف ليه ، عامل كتيبة م القلش ورجالته ، عامل لجنة عليا ..

حسنيين : قوم بص كده فى المراية ، شوف منظرک والنبي ..

اسماعيل : مانا باصص كويس ، بس فى مراية تانية ، مراية مفتوحة ع المستقبل، انت بتلعب ع الحبل ياحسنين ، انما انا شايف الحبل بيتهز بيك اليومين دول، الحبل بيتهز قوى ياحسنين، هينقطع *

حسنيين : دا بيتهالك م الخمرة ، كل شىء مهزوز فى عينك *

اسماعيل : (متنمرا) حكاية القلش دى أخسرتها وحشة يا حسنين . الفدائيين لو عرفوا الحقيقة ، هيخلصوا عليك . دول ما يعرفوش هزار ، لسه ماخدوش بالهم من حكاية التعمير، وفتح البيوت والكلام اللى انت بتقوله ده ، دول جد قوى يا حسنين ، ده جيل جديد انت مش اده ..

(يدخل ممدوح فجأة فينظر الى عمه وأبيه)

ممدوح : الله ، لامؤاخذة يا بابا ، انتو يظهر قاعدين قعدة انسجام
قوى .

اسماعيل : قوى قوى !

ممدوح : أمال الوليه راحت فين ..

اسماعيل : يمكن راحت تدور عليه ..

حسنيين : ولية ايه ..

ممدوح : دى ولية مجنونة ولسانها طويل .

(يدخل القلش مبتهجا)

القلش : الله ع الجور . نهارنا قشطة بالصلع النبى ..

اسماعيل : لازم الحكاية سمينة قوى ..

القلش : أما عملية ياسى ممدوح ، حاجة تفرح والنبى .

ممدوح : عملتوا ايه يا معلم

القلش : كل شىء المسطة واللى خلقك ، همه هجوموا كده ، واحذنا

هجمنا كده ، دخلت المعسكر هجمت زى الغول والسنجة

فى ايدى ، اللى بقيت أغزه بقى يقع بقيت أغز كده ، وأغز

كده ، حاجة تقرف .

ممدوح : القتلى من عندهم كثير ؟

القلش : أنا بقيت فاضى اعد ، اهو اللى بقى يقابلنى فى وشى الهفه .

ممدوح : (مسرورا) أيدك أبوسها يا معلم .

القلش : أستغفر الله ، ودى تيجى دى ، دا كله فدا الوطن .

ممدوح : والجماعة أزيهم ، بخير .

القلش : الله ينكد عليهم بحق جاه النبى .

ممدوح : ليه ؟

القلش : أنا سمعت انهم جم هنا ، وفضحوا الدنيا ..

ممدوح : أنا بقولك الجماعة بتوعنا ..

القلش : الله ، هوه انت متجوز ياسى ممدوح .

ممدوح : الفدائيين ، قصدى الجماعة الفدائيين .

القلش : آه ، بخير قوى ، كل شىء المسطة دى كانت مدبحة ، السدم

للركب ، دبحنا فيهم زى الفراخ .. اعملوا لنا كئكة قهسرة

امال ، دماغى هتطق واللى خلقك .

- ممدوح : ميت كئكة قهوة علشانك ، انت تستحق وسام
- القلش : اعمل ايه ، اللي بقى بييجى فى سكتى بقيت الهفه
- ممدوح : يا زينب ، زينب

(تدخل زينب لتقصص)

- زينب : أيوه يا سيدى (تنظر للقلش) انت جيت يامعلم ، كان فيه جماعة ضيوف مستنيينك النهاردة
- القلش : مش الحمد لله مشيت .. اعمللنا كئكة قهوة أمال ..
- زينب : حاضر يا معلم ..
- القلش : (لحسنيين) ماتديها مفتاح الأرار
- حسنيين : جوه ، جوه ..
- القلش : (يجلس) ياسلام يا رجاله ، دا يوم مفترج النهاردة ، انا وحياتة سيدى الغريب بقى اللي بييجى فى سكتى الهفه
- اسماعيل : ولهفت كتير يا معلم ؟
- القلش : انا كنت فاضى أعسد ، أهو اللي بقى فى سكتى ، الهفنه ..
- وسيدى الغريب دى مديحة ، دا الدم للمركب يا جدعان ..
- ممدوح : قولنا ايه اللي حصل بالظبط
- القلش : بقولك مديحة ، بييجى ألف انجليزى واللى خلقك ، بقوا مغرشين على الأرض زى الفسيخ (ينفض ملابسه) اخيه قطعولنا هدمنا ، كئكة قهوة يا عالم
- ممدوح : كئكة قهوة !! وانت يتعملك تمثال ، تمثال فى فايد ، جوه القيادة البريطانية
- القلش : قيادة!! هيه دى قيادة ، دول غنم، انا جسمى نار كله مولع، صوابع ايدى واقفة • انا خدت واد ظابط انجليزى بكف ايدى طرشته الدم واللى خلقك
- ممدوح : هات صوابعك أبوسها يامعلم
- القلش : استغفر الله • ركبتى رخره بتزن على ..
- (يدخل أحد الفدائيين شعره غير مرتب ودمه سايل ، وعيناه يتطاير منها الشرر)
- الفدائى : (للقلش) دى عملة تعملها يا معلم ، دى عملة تعملها
- ممدوح : الله ، ايه الحكاية ؟

- الفدائي : حضرته سبنا فى المعركة ، ودخل الكامب يسرق مواشير .
- ممدوح : يسرق مواشير .
- الفدائي : دا اللى حصل يا ممدوح .
- ممدوح : وحصل ايه فى المعركة ؟
- الفدائي : كنا منضيع كلنا . لولا معجزة كنا متنا كلنا .
- ممدوح : حد مات ؟
- الفدائي : ثلاثة يا ممدوح ، خدعنا القلش .
- القلش : الله ، هو ايه بس اللى حصل .
- الفدائي : انت مش سبتنا فى المعركة ، ودخلت تسرق مواشير .
- القلش : بس ماتقولش أسرق دى غنايم .
- اسماعيل : معذور ، أهو اللى بقى ييجى فى سكتة بقى يلفه .
- حسفن : يمكن يابنى يكون حصل حاجة كده ولا كده .
- الفدائي : أهو دا اللى حصل يا عمى .
- القلش : حصل كل خير ، عشان شوية غنايم حرب هيعملونا محضر ، مره احنا كفرننا ، أمال حرب ايه دى اللى مايموتش فيها حد .
- ممدوح : انما احنا ماتقناش على كده .
- القلش : وهيه الحرب فيها اتفاق ، الحرب خدعة .
- اسماعيل : الحرب لهف .
- ممدوح : انما احنا مش رايعين نسرق يامعلم ، احنا رايعين نحارب .
- القلش : وهيه دى سرقة .
- ممدوح : أمال دى تبقى ايه ؟
- القلش : دى غنايم ، انما أموالهم ومتاعهم غنايم لكم ، ماهو الأهرام أهه شيخ الأزهر بنقسه ، الله وهيه الحرب ايه ؟
- اسماعيل : الحرب لهف .
- القلش : ودينى اللى بقى ييجى فى وشى بقيت الهفه .
- اسماعيل : صادق صادق ، وماجاش فى وشك غير المواشير ، هتعمل ايه .
- ممدوح : بقى عشان شوية مواشير تضيع كتيبة .

القلش : وميه ضاعت ، والحرب مايبضيع قبيها !لوف ، ميه الحرب
ايه ؟

اسماعيل : الحرب لهف .

(يدخل بعض الفدائيين يصوب أحدهم مدفعه نحو
القلش)

انت كان لازم تموت النهارده ، واحنا اللي ح نموتك

القلش : ليه هو انا انجليزى من غير مؤاخذه .

القدائى : انت اخطر من الانجليز ، وان ماكنتش متخرج دلوقت
هاموتك .

القلش : أخرج أروح فين ؟

القدائى : تخرج من هنا !

القلش : هوه أنا جورج متجرجرنى من هنا .

حسنيين : بس يا جماعة ، خلاقاتنا نسويها بالراحة .
القدائى : دا مش خلاف يا حسنيين بيه ، دى جريمة .

حسنيين : طيب استنى بس أمال .

ممدوح : يستنى ايه يا بابا ؟

حسنيين : نتفاهم يابنى .

ممدوح : الحاجات دى مافيهاش تفاهم يا بابا .

القلش : الله ، هوه احنا كفرنا دا النبي خد الغنايم .

ممدوح : ياللا اتفضل بره .

حسنيين : انت برضه مصر يابنى .

ممدوح : أنا مش مصر بس دا ان ماكنتش هيخرج انا هاموته بأيدى

(يخطف المدفع)

حسنيين : هوه ايه بس اللي حصل يابنى عشان دا كله .

ممدوح : كل دا ولا حصلش حاجه يا بابا .

حسنيين : طيب يابنى مش كده نحل المسائل ، كل شىء بالراحة ، أنا
نائب المدينة ، وأنا اللي اتصرف .

القلش : أيوه أمال ايه ، هى الحكاية ايه ؟

اسماعيل : الحكاية لهف !

حسنيين : اتفضل اخرج يا معلم .

- القلش : (مذهولاً) أخرج !! أخرج منين يا حسنين بيه .
 حسنين : أخرج من هنا ، كل واحد يروح لحاله بقى ، كفاية اللي جرا
 اسماعيل : ورجالتك كمان يامعلم ، عشان تشيلوا الغنائم سوا !!
 القلش : بقى دى آخرتها يا حسنين بيه !!
 حسنين : أيوه دى آخره الخيانة !!
 القلش : خيانة !! أنا خاين يا حسنين بيه ، طيب طلاق ثلاثة مانا
 خارج .
 حسنين : لا ، دانت متخرج قوى ، اتفضلوا اطردوه .
 (يدفعه بعض الفدائيين الى الخارج ، بينما يصرخ
 بأعلى صوته)
 أنا خاين يا حسنين بيه ، أنا خاين ، أنا خاين ، أنا خاين .

ستار

الفصل الثالث

حجرة الصالون فى منزل حسنين بيه ، حسنين بيه يجلس على مقعد مريح ويمدد رجليه على مقعد آخر يرتدى جلبابا وروبا وجاكتة ويدخن شيشة ، تتصدر الصالون صورة ضخمة لرجل عجوز فى ملابس افرنجية • الى جانب حسنين بيه تراييزة صغيرة عليها بعض الدفاتر والكتب ، وفى يده دفتر منها ينتظر فيه بامعان • اسماعيل شقيقه يجلس بعيدا عنه فى طرف الصالون ، رأسه الى الخلف ، عيناه مغلقتان كأنه نائم ••

- حسنيين : (يلقى بالدفتر الذى فى يده) يانسر ، يانسر ، يانسر ••
- اسماعيل : (يستيقظ اسماعيل مفزوعا) ايه ، جرا ايه ، جرا ايه ••
- حسنيين : بقالى ساعة أنده على نسر ماحدش بيرد على •
- اسماعيل : نسر ماطفش من امبارح ، راح مع الفدائيين ••
- حسنيين : ايه راح مع الفدائيين ، فدائى راخر ، ٢٥ سنة مربيه فى بيتى زى مايكون كلب ، وياريته كان كلب ، لو كان كلب ماكانش سابنى ومشى ••
- اسماعيل : ماهو عشان ماهوش كلب مشى ، أنا كنت فاهمه كلب ، انما طلع راجل ، البوبى مشى وأنا لسه قاعد •
- حسنيين : ماتقوم يا أخى تفارقنى ، ماتفارقنى يا أخى ••

اسماعيل : مش قادر ، ومفارقك أروح فين ؟ انا قعدت ٢٠ سنة في
زنزانة ، و ١٢ سنة في بيتك ، فاضل ٨ كمان واطلع على
السجن الأبدى ، ع القبر على طول ..

حسنيين : (ينهض بصعوبة ، ويتجه نحو الحائط ، ويفتح خزانة سرية
ويحضر منها بعض الأوراق) انت عمرك ما قعدت في بيتي ،
طول عمرك قاعد في الخمار ، بيتي كان لو كانددة وبنك ،
نوم وفلوس . دا انت لو كنت ابني ما كنتش استحملت ،
حايالله اخ وخايب ، التركة اللي سابها لى المرحوم .
(يشير بنظره الى الصورة التي تتصدر الصالون)

اسماعيل : (يدقق فى الصورة ثم يضحك) الله ، دى صورة جديدة لنج ،
يعنى ماشفتهاش قبل كده .

حسنيين : وانت من امى بتشوف ، الخمره عمك .
اسماعيل : (يتنظر للصورة ويضحك) الله ، وانت لبسته بدله ، أيوه
كده ، عشان يبقى عبد الباقي بيه ، العيلة تبقى كنها بهوات
.. حسنين بيه وعبد الباقي بيه .

حسنيين : (وهو يجلس على الكوسى ويمدد رجليه) واسماعيل بيه كمان .
مانت بيه قد الدنيا أهو ، دانت بتشرب ويسكى بماهية
واحد وزير والبركة فى الطور اللي انت بتحلب منه .
اسماعيل : مطبوط ، البركة فيك يا حسنين ، أنا شخصيا بعترف بالجميل
حاكم أنا راجل وفى .

حسنيين : أيوه وفى قوى ، وياريتك بس تنقطنا بسكاتك ، الا عاوزه
تخرب بيتي كمان ، رايح تسلط ممدوح عشان يسيبنى
ويطفش .

اسماعيل : أنا لاسلط حد ، ولا ممدوح طفش ، الراجل ماهو جنبك
أهو بينك وبينه ايه ، فركت كعب يعنى .

حسنيين : أيوه اعمل عبيط يا اسماعيل ، وأنا أخوك الكبير وعارفك
كويس ، انت مش عبيط ولا حاجة ، انت انصح من العفاريات
السزرق .

اسماعيل : متشكرين ، دا رأى اعتر بيه ، أخويا حسنين الناصح ،
بيعترف اننا انصح م العفاريات الزرق ، متشكرين ..

حسنيين : أيوه استهبل ، فضلت تزن على ودان الواد اللي حبلىتى ،
أبوك خاين ، أبوك انجليزى ، لحد ما سابنى وطفش ، بكره

الانجليز يموتوه ، وأروح فى داهية انا راخر وتقعند انت

غلى ثلها ، تورث ، وأبقى أفتح بحر خمره فى السويس .

اسماعيل : انا ماقلتش عليك خاين ، الناس اللى بتقول ..

حسنيين : ناس مين دى اللى بتقول ؟ انا خاين وانت ايه ، ماحدث

قال عليك حاجة أبدا ، ولما انا خاين طول النهار بتشغط

منى ليه ، مش عيب يا وطنى تسكر بفلوس واحد خاين ،

مش خيانة دى رخره .

اسماعيل : (متضايقا) انت عيبت وقعدتلى مابقاش فاضل غيرى

يا حسنين ، طيب انا سايبك وماشى .

حسنيين : أبوه كده يا أخى ، اختشى على عرضك وسيبنى ، اعمل راجل

مرة وسيبنى ، مانتش زى نسر ، مش كان معاك فى الثورة ،

ما تروح معاه .

اسماعيل : (ينهض ويتجه للخروج) أدينى رايع ، استريح بقى ..

حسنيين : أبوه ادينى رايع ، رايع فين انشاء الله ، بار الثورة ، بار

الكنفاح ..

(يتصرف اسماعيل ويصرخ حسنين)

حسنيين : يا حسنية ، يا حسنية ..

(تدخل سميرة مهرولة)

سميرة : نعم يا عمى ..

حسنيين : انتو فين يا بنتى ، عمال انده م الصبح .

سميرة : ماتتعبش نفسك يا عمى ، انت عيان ومحتاج راحة ..

حسنيين : أبوكى يا بنتى اللى تعينى ، ومن شوية قور دى ، وعكنن

دماغى ، هيه حسنية فين ؟

سميرة : جوه يا عمى .

حسنيين : طيب اندهيلها يا بنتى ، وروحى انتى شوفلى القلش فين .

اندهيلى القلش ، تلاقه ع القهوة اللى على راس الشارع .

سميرة : حاضر يا عمى ..

(تخرج سميرة)

حسنيين : (يحدث نفسه) غريبة ، كانوا ٢٨٠٠ جنيه حاظطهم بايدى ،

بقوا ألفين ازاى ، الفيران كلتهم ، طيب رايه مش ٧٩٠ ،

فيران دقى يعنى ، فيران م الجامعة والا ايه

(تدخل حسنية زوجة حسنين)

حسنية : ايوه يا حسنين

حسنيين : ايوه ايه ، ٢٨٠٠ جنيه حاططهم قدامك مش لاقى دلوقت غير

الفين جنيه ، راح فين الباقي ، كلتهم العتة

حسنية : لا ماحدث كلهم ، انا اللي خدتهم

حسنيين : طيب يا حبيبتي مش تقولى

حسنية : والنبي نسيت ، هو الواحد بقى فيه دماغ يفكر حاجة

المعلم زيدان بتاع البيضاخ جه وكان مستعجل ، خدت

الفاتورة واديته المبلغ

حسنيين : عملتى خير ، اهو كل واحد خد حقه ، الدور والباقي علينا.

عمالين ينتشوا من لحم الحى ، والعزبة الهباب اترصدت

زى ماتكون عين وصابتنا

حسنية : وهيه العزبة متروح فين يا حسنين

• ماهى ملقحة مطرحها

حسنيين : وآخرة تلقحتها ايه

• ايه اللي خدناه ، والا ايه قبضناه

انا هنشل يا حسنية ، قلبى هيقف مرة واحدة

• متقدمينى قريب وتستريحى

حسنية : ماتبطل اكل فى نفسك بقى ، ماتشوف صحتك يا شيخ

• دا هية فى العزبة واللى بنوها

حسنيين : انا كان ايه اللي صابنى فى عقلى ياخواتى ، خمسين سنة

أدبى واحوش واحرق دمنى نقطة نقطة ، وبعد دا كله يلغوا

المعاودة

حسنية : ادى أنت بقالك خمسين سنة بتجرى لما انقطع قلبك ،

استريح شوية ، خد نفسك شوية ، الدنيا ماطارتش

يا حسنيين

حسنيين : الدنيا ماطارتش صحيح انما عقلى اللي طار

• عقلى يا حسنية

حسنية : ادى أنت طول عمرك حايس ولايس ع الفلوس وادى أنت

شفت آخرتها • فلوس ايه ونيلة ايه ، حد خد حاجة معاها

حسنيين : (ينظر بجئون نحوها) انت ماجربتيش الفقر ، مادقتيش

الجوع • انت بنت ابراهيم القومندان ، من عيلة

القومندان ، أنا شكل تانى • عمرك مالبستى جليبية مقضعة •
عمرك مانمتى من غير عشا •• عارفه من غير عشا يعنى
ايه ، لو نمتى من غير عشا كنت عرفت يعنى ايه الفلوس •

حسنية : ما هو دا تاريخ راح يا حسنين •

حسنيين : ايوه صحيح ، بس ما بيتنسيش (وهو يهز رأسه) سنة ٢٠
كنت ساكن فى أوده بستة ساغ ، وكنت بادفعهم بالتيلة
كان عندى شراب مخليه للفسح ، وفسح ايه ، كان
الواحد يطلع يمشى زى الفرخة الداخنة مش عارف
يروح فين ، تعرفى ، خرجت مرة مشوار خمس دقائق ،
رجعت مالمقتش الشراب فى رجلى مع انى ما قلتش
الجزمة أبدا •

حسنية : طيب مش محمد ربنا •

حسنيين : أحمده على ايه بقى ، على الهنا اللى أنا فيه ، ع الحظ
السعيد اللى هبط على م السما ، ما كل شىء راح ، راح
حتى العزبة رخره • (بيكى) •

حسنية : أنت بتعيط يا حسنيين •

حسنيين : (يجفف دموعه ويتظاهر بالقوة) أنا مش بيعط مهزوم ، أنا
باعيط م الغيظ ، الغيظ اللى فى قلبى يا حسنية • وآخر
التمة س ممدوح خد العيال بتوعه أم قصة وراح قعد
فى العزبة •

حسنية : ودى فيها ايه يا حسنيين •

حسنيين : فيها ايه ازاي ، فيها خرابى المستعجل ، بكره الانجليز
يدربكوها ، بكره تبقى انقاض تبقى خرابة ، خرابة ، عارفة
خرابة يعنى ايه •

حسنية : والانجليز هيدربكوها ليه •

حسنيين : الا يدربكوها ليه ، آمال هيعملوها ايه ، يسموا عليها ،
ينضفوها • مادام مستخبي فيها ، هيه الحرب لعبة ، دى
حرب ، والانجليز ماعندهومش يامه ارحميينى •

(تدخل سميرة مسرعة)

سميرة : عمى ••

حسنيين : أنت جيتى يا بنتى •

سميرة : ايمه يا عمى ، والقلش جه معايا اهمه .

حصينة : اتدهيله يا بنتى .

حصينة : (وهي تستعد للانصراف) انا والله دماغى ما بقت فيه .

اف ، دا غلب ايه دا يارب .

(تنصرف وفى أعقابها يدخل القلش)

حصنين : املا بالمعلم .

القلش : على الحرام لوما الست جتنى بنفسها ما كنت معتب هنا

ولا شارب فيه ميه .

حصنين : ليه ، احنا عملنا فيك ايه ؟

القلش : عملت ايه ، يا سبحان الله ، بقى انا خاين يا حصنين بيه ؟

حصنين : (ضاحكا) روحى انت يا سميرة خلى زينب تعملنا قهوة .

سميرة : حاضر يا عمى (تنصرف)

حصنين : كان لازم اعمل كده يا قلش ، انا كنت فاهمك ابن بلد

وهتفهمنى ، تعرف لو انكشفتنا ، كنت ضعت انا وانت .

القلش : برضه كل كوم ، والخيانة دى كوم يا سعادة البيه ، الا

حكاية الخيانة دى ، انا راجل شريف وانت عارف .

حصنين : الا عارف .

القلش : آه ، الناس بتاكل عيشها بعرقها وانا باكله بدمى .

حصنين : بقى مش عيب تزعل منى ، دا انت صاحبى وحبييى ، وسرى

عندك ، وبعد دا كله تزعل منى ، مش لازم تقدر يامعلم .

القلش : انا بصراحة زعلت ، وطول مانا نايم اتقلب وانا باغلى .

حصنين : دلوقت خلىنا فى المهم .

القلش : ان كان ع الشغل نشغل لوحدينا ، صنف تلعيذ معانا مش

عاوزين .

حصنين : لا شغل ولا حاجة ، هوه فيه شغل هينفع دلوقت ، المسألة

أخطر من كده .

القلش : انا خدامك ، انت تؤمر واللى خلقك .

حصنين : انت عارف العيال التلامذة راحوا قعدوا فين .

القلش : سمعت انهم قعدوا فى عزبة بنايوتى .

حسنيين : مذبذب ، فتحوا العمارات وسكنوها ، ولو الاتجيز عرفوا
الخبر المهيب ده هيهدها *

القلش : تبقى مصيبة واللى خلقك ، انا عندى فكرة بس انت تؤمر
حسنيين : ايه ، ايه دى يا معلم *

القلش : انا آخذ الزجالة بتوعى ونقعد فى العزبة ، ونطرد الأفندية
دى من هناك *

حسنيين : وهتطردهم ازاي ؟

القلش : بالذوق ، بالعافية *

حسنيين : تعرف تتدهلى لوانيدا ، عاوز لوانيدا ، عاوزه باى طريقة ،
تعرف تجيبوا * ان قالك ماجاش هو ليه ، قوله عيان
بيموت *

القلش : ألف بعد الشر عنك يا حسنين بيه ، دانا خدامك واللى
خالق *

حسنيين : اذا جبتوا متعملى خدمة كبيرة ، خدمة كبيرة يا معلم *

القلش : دانا خدامك واللى خلقك ، بس انت تؤمر ، بس الهفنى
خمسة دلوقت *

حسنيين : مانا لهفك خمسة من يومين *

القلش : مشوار زى ده عاوز تكاليف يعنى أروح لحد اللوكاندة جيبى
فاضى ، مايخلصكش برضه *

حسنيين : اللوكاندة ماهى خطوتين جنبنا ، على كل حال اتفضل ،
بس تجيبه ، تجيبلى لوانيدا *

القلش : (وهو يتصرف) دانا خدامك واللى خلقك ، بس انت تؤمر -

حسنيين : (بصوت عال) سميرة ، سميرة ..

(تدخل سميرة ، ومعها صينية القهوة)

سميرة : الله ، هو المعلم مشى ..

حسنيين : أبوه يا بنتى ، خرج ..

سميرة : وطنط راحت قين يا عمى ..

حسنيين : أقعدى يا بنتى أقعدى يا سميرة (تجلس سميرة بجانبه)

اسمعى يا بنتى أنا النهاردة بقيت لوحدى ، مافيش حد معنا

دلوقت الا أنا وانت وربنا *

سميرة : ليه يا عمى ، وطنط وبابا ومدوح ؟

حسنيين : حسنية منها لله ، منها لله ، عشان عيبت وحطيت (وهز
يخبط على ركبتيه) ومابقاش فيه رجا ، وشبتمنى وزغقتلى
يا بنتى ، زعقتلى وانت بره وقضحتنى ، عشر سنين مهنيتها ،
وعاملها ملكة ، ملكة ، وبعد العمر ده كله تزعقتلى وتفضحنى
وأنا عيان .

سميرة : يعنى طنط مشيت مش جايه تانى يا عمى .

حسنيين : أنا عارف حاجة يا بنتى ، مانا قاعد معاكى أمه العيلة
اتجنتت ، كلها ، انخبلت يابنتى ، أبوكى راح لحاله ،
وحسنية طفشت ، وسى ومدوح راح عزبة بنايوتى .

سميرة : وانت مش ناوى تصالح مدوح وترجعوا تانى يا عمى .

حسنيين : (ثائرا) ماتجيبيلش سيرته ، ماتجيبيلش سيرته أرجوكى .
دا مش ابنى ، مش من ضهرى ، دا واد خسران من بتوع
الأيام دى ، بقصة ، هوه الراجل اللى بقصة ينفع ؟

(تبكى سميرة)

حسنيين : (غاضبا) بتعيطى ليه دلوقت ، هوه أنا مت ، مانا عايش ،
أنا لسه عايش ، أنا أقوى منهم كلهم ، أقوى منهم ولو كانوا
قد كده عشر مرات ٠٠ ايه يا حلوة ، امسحى الدموع أمال ،
امسحى الدموع ، الله ، الله ، هوه أنا أقدر على زعلك ،
ماهو مدوح اللى مشى ، أنا كنت زعلته ، ماهوه السبب
يا بنتى .

(تستمر فى البكاء وحسنيين يواصل حديثه)

سميرة : نعم .

حسنيين : عارفه مطرحه ، هوه فى عزبة بنايوتى ، روحيلو ، هاتيه
معاكى قوليلو اننا عيان ، قوليلوا ابوك بيموت ، هاتيه هنا
وأنا هصالحه عشان خاطررك ، وانت كمان ساعدينى ،
عاوزك تعقلية يا بنتى ، هيودر نفسه ، العزبة هيهدوها
الانجليز ، آخرة شقايا وتعبى . روحى يابنتى ، اغسلى
وشك أمال ، وروحي لمدوح ، هاتيه معاكى يا حبيبتى ،
بالا ، بالا .

(تنصرف سميرة الى الداخل ويبقى وحده يرتب دفاتره
على المائدة)

(تدخل سميرة مرة أخرى)

سميرة : انا رايحة يا عمى *

حسنيين : (يقبلها فى جبهتها) مع السلامة يا سميرة *

(تخرج سميرة ثم تعود بسرعة)

سميرة : دا القلش بره يا عمى *

حسنيين : خليه يخش يا بنتى خليه يخش وروحى انت *

القلش : لو انيدا مش فى اللوكاندة *

حسنيين : روحلوا الكامب *

القلش : طيب دى حاجة خطيرة بصراحة ..

حسنيين : وغاوز ايه يعنى *

القلش : نحسبها طلعة ، دى واللى خلك اخطر م الطلعة ، الطلعة

ع الاقل معايا الرجالة ومعايا سلاح *

حسنيين : وهو انت رايع تحارب ؟*

القلش : انا خايف عسكرى انجليزى م اللى عارفينى يشوفنى يهدبنى

رصاصه *

حسنيين : طيب يا سيدى نحسبها طلعة ، اتفضل *

القلش : وجب ، سلامو عليكو (ينصرف)

(يجلس حسنيين وحده يرتب فى دفاتره القديمة ، يسمع

رئين الجرس يتقدم ويفتح الباب يدخل رجالة القلش)

البرنس : الله الله ع الجد يا سعادة البيه ، بقى احنا منا ليك *

مالناش دعوة بالقلش *

حسنيين : انا عيان يا معلم زى مانت شايف ، المسائل دى نأجلها

لحد الجرم ما يروق *

المعلم برنس : الجو رايق والحمد لله ، احنا عاوزين حقنا بالصلاة ع

النبي *

الرجالة : (فى صوت واحد) الحق مايزعلش *

حسنيين : حق ايه يا رجالة ؟

المعلم : طلعتنا ٤ طلعات ماشفناش سوادى *

- حسنيين** : طيب ما هو الشغل واقف ، ولما نستأنف العملية نتحاسب
- الرجالة** : (فى صوت واحد) • ما فيش استئناف ولا ابرام ، الجـد
جد ، والحق مايزعلش •
- حسنيين** : حقكم م العين دى والعين دى ، بس لما نشتغل تانى •
- الرجالة** : وافرض ماشتغلناش •
- حسنيين** : برضه نتحاسب •
- المعلم برنس** : طيب مانتحاسب دلوقت •
- حسنيين** : منتحاسب منين ، المواسير ولسه مرصيه فى المخزن، والشغل واقف ، والحرب وشغاله ، والتلامذه وآدى انتو شغتم بنفسكم •
- المعلم برنس** : مواسير ايه اللى فى المخزن ، وانت مابقالك ١٠ سنين بتبيع فى مواسير ادينا حقنا مالناش دعوة بالمواسير •
- الرجالة** : الحق مايزعلش •
- حسنيين** : يعنى قصدكو ايه •
- المعلم برنس** : عاوزين حقنا •
- حسنيين** : طيب انا مش ماشتغل الشغلة دى خلاص ، بطلنا ، اللى عاوز حقه يرفع قضية ••
- المعلم برنس** : قضية ، حلوة دى ، ليه ، هوه انت فاتح مصنع ، دا خطف يا بيه •• خطف •
- حسنيين** : خلاص انا بطلت خطف ، كفاية خسرت ابنى ، وخسرت فلوسى ، وخسرت حياتى كلها •
- المعلم برنس** : لا بعد الشر يا بيه ، على كل حال كل واحد يروح فى سكتة، وانت حسنين بيه ، واحنا الحرامية •
- احدالرجالة** : طيب والنبي دانا خليها ضلمة •
- واحد تانى** : على الحرام اموتلى كام واحد واتشقق ، انا ما اتخلفش اللى ياكل حقى •
- واحد ثالث** : طيب انا ماوقف عند الأربعين • خللى صنف كلب يطلع يجيب ماسورة ، على الحرام مانتا شايف مواسير بعد النهاردة •
- حسنيين** : اللى تقدرؤا تعملوه اعملوه ، اتفضلوا •
- المعلم برنس** : ولا تزعل نفسك يا حسنين بيه ، احنا برضه رجالتك

- حسنيين : وانا ماليش رجاله ، انا بطلت خلاص ، مع السلامة .
- حدالرجالة : موه ايه اللي مع السلامة .
- نعلم برنس : بس ، لحد كده احنا خلصنا ، كل واحد يشوف شغله ، واللى يقدرنا ربنا على حاجة يعملها ، سلامو عليكز .
- حسنيين : مع السلامة .
- (ينصرف الرجالة ، يعود حسنيين الى الداخل ويفهمك في ترتيب أوراقه)
- حسنيين : (وهو يقلب فى الأوراق) دى عالم ايه دى ، اعوذ بالله .
- (بيرن جرس الباب ، يتقدم ويفتح ، تدخل سميرة .
منشحة)

حسنيين : ممدوح جه ؟

سميرة : أيره يا عمى .

(يهرول ناحية الكرسي ويجلس متصنعا المرض الشديد ، يدخل ممدوح ، ينظر الى أبيه لحظة ، ويظل واقفا)

ممدوح : مساء الخير يا بابا .

حسنيين : مساء الخير يا بنى يا ممدوح .

(ثم يواصل حديثه دون أن ينظر اليه)

الناس بتخلف عيال عشان تحضر موتها ودفنتها ، وانا مخلف راجل عمال بيدور ويلف حوالين الحروب وأبوه يموت لوحده .

ممدوح : انا ماسيبتكش يا بابا انت اللي سيبتنى .

حسنيين : بقى كمان انا اللي سيبتك ، انا اللي فتحت بيتى لرجالتك ، وفتحت قلبى وفتحت نفسى ، وعملت نفسى الصغير راندو الكبار ، برضه بعد دا كله ، انا اللي سبتك يا ممدوح ، انا اللي سيبتك .

ممدوح : الحكاية دى انتهت يا بابا ، وانا مش جى اتعاب دلوقت ، انا جى اسأل عن صحتك ، سميرة قالتلى انك فى حالة خطيرة .

حسنيين : امدال كنت منتظر ابقى فى حالة ايه ، انيساط ، انا اللي فيه ما تتحملوش الجبال ، انما عمرى ماعيط ، عمرى ما صرخت ، طول عمرى كنت راجل ، وهاموت راجل .

(يطرق ممدوح برأسه ويسسكت)

حسنيين : (يستأنف الحديث) أنا مايقاش فاضللى كثير ، كلها شهر والا اتنين وارتاح على طول ، وثورتى كلها بره ، فى بنسوك وخزن خصوصية وعند ناس ، وأنا حظيت خلاص ، مايقاش عندى قوة اعمل حاجة ، واهو كل شىء راح يبقى بتاعك ..

ممدوح : أنا شخصيا عاوزك تعيش ، ومش عاوز الثروة دى أبدا .

حسنيين : دا كلام مش على ، كلام ماينفمش دلوقت ، لازم نكون عمليين ونواجه الحقيقة ، والحقيقة ان انا استهلكت ، خلاص وكل انسان بي موت ، وأنا جت ساعتى (يمسك بالدفاتر ويلقيها أمام ممدوح) الدفاتر دى فيها كل شىء ، لازم تشوفها وتعرف كل حاجة ..

ممدوح : بس أنا دلوقت ..

حسنيين : (مقاطعا) عارف انك فى الكفاح ، فى الثورة ، بس انت مش متعيش طول عمرك فى الثورة ، بكرة المسألة تنتهى ويرجع كل شىء لحاله .

ممدوح : انما ..

حسنيين : (مقاطعا) أنا مش عاوزك تسبب الثورة ، ولا تبطل كفاح ، انما وانت فى الكفاح برضه تاخذ بالك من حالك .

ممدوح : أنا شايف ان مرضك ده مسألة طارئة ، وبكرة تخف وتبقى عال ، وأنا فوق دماغى مسئولية كبيرة ووقتى كله بقضيه فى العزبة ، وعندنا جرحى وقتلى وبلاوى مثلتلة ، وانت عارف ان صاحب بالين كداب ، والانسان لا يمكن يجييد عمليين فى وقت واحد ..

حسنيين : وايه اللى مقعدك فى العزبة ، بيت أبوك قليل ، مش قد المقام ، هات رجالتك واتفصل ، البيت فضى من كله دلوقت ، وان كنت أنا مضايكو يا سيدى ، أسيبهولكو وامشى ..

ممدوح : استغفر الله يا بابا ، مش حكاية مضايقة ، انما المسألة كلها ان احنا مرتاحين هناك ، ودول شبان فى سن واحدة .. وساعات بييجوا يهرجوا ، يزعقوا . والبيت هنا مايسمحشى بالحاجات دى .

حسنيين : ماكان سامح فى الأول وكان كويس .

ممدوح : كانت الظروف مختلفة ، دلوقت احنا اكثر ، ومشاكلنا بقت أضخم ، ثم وانت زعلان ليه ، مااحنا فى بيتك برضه ، هوه

احنا رحنا بعيد ، ماحنا فى عزبة بنايوتى ، ومن حق
احنا سمينها ، معسكر حسنين بيه ..

حسنيين : وحسنيين ده ، مالوش كلمة فى المعسكر بتاعه ؟ ثم تقليبة
ايه دى اللى انتوا طلعتولى فيها آخر الزمن ، الجيش بيقد
فى معسكر متكلف ٣٥٠ الف جنيه ، الانجليز ما هم قدامكم
اه ٠٠ قاعدين فى باركيه وحمامات لوكس ، والا فى رمل
وسور سلك وخيم تقرف ، انتو اغنا والا الانجليز ، يا فرحتى
معسكر حسنين بيه مش دا مالك ومحتالك ده . مش ده
بتاعك كله ..

ممدوح : احنا يابابا مش قاعدين فى بيوت المدينة كلها ، احنا قاعدين
فى عمارة واحدة ..

حسنيين : كلام ايه دا اللى انت بتقوله ، والانجليز لما تهجم عليكو ،
هيكسروا عمارة واحدة ويسيبوا الباقي ، والا هيكسروا
الكل ، انت لما بتهجم على معسكر ، بتحرق خيمة واحدة ،
والا بتحرق المعسكر كله ..

ممدوح : احنا مافكرناش فى الموضوع ده .

حسنيين : طبعا مافكرتوش ، اللى ايده فى النار ، مش زى اللى ايده
فى الميه .

ممدوح : وايه اللى هيخلى الانجليز يهجموا علينا ، احنا فى حته
مستخبية ، وبعيد عن الناس ، لا حد شافنا ولا حد عرفنا .
حسنيين : ايوه صحيح والانجليز فى كل حته فى السويس ، دول

عارفين احنا كام واحد فى الأوده دلوقت ، همه دول حاجة
بتستخبا عنهم . دول عارفين ابليس مخبى ابنه فين .
ممدوح : يعنى انت خايف ع العمارات مش علينا يا بابا .

حسنيين : وأنا خايف ع العمارات ليه يابنى ، مش عثمان اللى فيها ،
العمارات فى ستين داهية ، الراجل يساوى ألف عمارة ،
راجل زيك لو التقت لحاله وفتح عينيه بينى ميت عمارة .

ممدوح : طيب مالحكاية واحدة ، ماتفرض ان احنا هنا ، ما الانجليز
برضه هتخش تهد وتحرق ..

حسنيين : الحكاية واحدة ازاي بقى يابنى ، هنا امان ، جوه البلد ،
الانجليز عمرهم مايخشوا هذا ، فما مجانين .

ممدوح : على كل حال يا بابا احنا هنسلك فى امان وعاملين حسابنا
على كل شىء ، حتى لو حصل هجوم . واحنا هناك مرتاحين ،
على الأقل بعيد عن القلش ولوانيدا والريس سعد الله .

حسين : (فى ثورة) برضه متقوللى القلش ولوانيدا وسعد الله ، همه
كفار ، مش عالم بنى آدمين زينا .

ممدوح : على كل حال احنا اتخذنا قرار بالمسألة دى يا بابا .

حسين : خدتو قرار ، انتو مين ؟ حكومة تانية .

ممدوح : احنا اللى ح نقولو نعيدو تانى يا بابا .

حسين : لا مانى مش قد المقام ، تكلم معايا ليه ، هو انا بافهم ولا
باعرف حاجة ، هو انا بقصة زى اخوانا .

ممدوح : انا مش عاوز أعكر دمك يا بابا ، انا اطمنت على صحتك
والحمد لله ، عن اذنك .

حسين : يعنى كلامى دا كله ولا دخل دماغك ، كنت بهوهر .
(ممدوح يتجه نحو الخارج ، حسين يصرخ)

حسين : يعنى هامت وانا غضبان عليك ، همتو يا ممدوح يا ممدوح ،
ممدوح ..

(بعد أن ينتهى ينهض حسين ويدخل من الباب الآخر ،
وهو يصيح ، التليفون ، التليفون)

(يبدو المسرح خاليا لحظة ، ثم تدخل سميرة متلصصة
تبحث عن عمها ، ثم تنادى ممدوح ، ممدوح)

سميرة : انت ماشى ؟

ممدوح : مانت شايفه . ولا يهكم ، انا هابقى اطل عليكى ، امال
طنط فين ؟

سميرة : خرجت ، اتخانقت مع عمى ومشيت ..

ممدوح : وعمى راح فين ؟

سميرة : اتخانق مع عمى وخرج مارجعش .

ممدوح : يعنى البيت قضى ، البركة فيكى انت ..

سميرة : يعنى انا اللى انكتب على الشقا دا كله ، طنط مشيت ، وبابا
مشى ، وانت ماشى ، اذ اكمان نفسى امشى يا ممدوح ..

ممدوح : أنا كنت عاوز أقولك تعالى معايا ، انما أنا شايف إن مكانك هنا دلوقت ، الراجل صحته تعبت ، وعقله خف • خايكى
معا ••

سميرة : ايه •

ممدوح : أنا أول ماجيت أبوكى حذرنى بس أنا مافهمتش ، كنت فاكركه بيخرف م الخمرة ، طلّع أوعى منى • انهم أنا هاسيبك دلوقت • وكل ليلة بالليل الساعة ٧ ، ابقى بصى
فى النجمة اللى بتلمع قوى فى وسط السما •

سميرة : ليه ؟

ممدوح : أنا كمان هابصلها •

سميرة : اسمها ايه النجمة دى •

ممدوح : (يضحك) والنبى مانى عارف اسمها ايه ، النجمة اللى بتلمع
وبس ، دايماع الشمال • هيه سلام بقى •

سميرة : خايك معايا •

ممدوح : لا عشان الشغل •

سميرة : يعنى فيه شغل دلوقت •

ممدوح : ما هو فى الحرب الناس مابتشتغلش على كيفها ، الشغل
بيجى فجأة •

سميرة : طيب مع السلامة يا ممدوح •

ممدوح : سلام يا حبيبتى •

(يقبلها وينصرف)

(تخرج سميرة ويدخل حسنين بيه وزينب ومعها

التليفون ، بعد لحنة يسدع صوت القلش)

القلش : اتفضل يا خواجه لوانيدا ، اتفضل •

(يدخلان المسرح)

القلش : يا ألف بعد الشر عليك يا سعادة البية ، دى العالم كلها
فداك واللى خلقك ، غيرش المؤمن منصاب (ينظر لزينب) •

زينب : انشالله تنصاب فى عقلك •

حسين : اتفضل ياخواجه ، اتفضل يا لوانيدا ياخويا •

- لوانيسدا : سلامتک خسنين بيه ، سلامتک .
- حسفين : تسلم ياخويا . . بقالى يومين فى الرفدة المهيبه دى ،
 اقعد ، اقعد يامعلم اقعد . .
- لوانيسدا : خير انشا الله . . لازم شوية برد . .
- حسفين : انشا الله خير يالوانيسدا .
- لوانيسدا : انا والله لو يعرف كده ، كان لازم ييجى على طول ، بس
 انت عارف خوته كثير اليومين دول .
- حسفين : وآخرة الخوة دى ايه يالوانيسدا ؟
- لوانيسدا : كل شىء راخ ييجى تمام خسنين بيه .
- حسفين : وهو فين التعمام ده بس يا لوانيسدا ؟
- لوانيسدا : شوية كمان خسنين بيه ، شوية كمان .
- القلش : شويتين ياخويا مش شوية وربنا يجيب العواقب سليمه
 وبنفض م المولد ده ، وكل واحد يشوف شغله .
 (ينظر لزينب)
- حسفين : الجماعة سابو البيت وراحو سكنوا فى المدينة . .
- لوانيسدا : انا لسه معلم بيقوللى دلوقت .
- حسفين : مصيبة كبرى يالوانيسدا ، انا لازم عملت حاجة وحشة قوى
 عشان كده بيتنقم منى .
- القلش : عمالك كلها خير ياسعادة البيه ، غيرش المؤمن منصاب
 ياخوانا ، المؤمن منصاب وحياتك يا لوانيسدا .
 (ينظر لزينب)
- لوانيسدا : منصاب امتى . . ؟
- القلش : هو ايه اللى امتى ، بقلك المؤمن منصاب .
- (يسمع رنين جرس الباب . فقرة صمت)
- حسفين : انا عاوزك تعمللى خدمة يالوانيسدا .
- لوانيسدا : انا تحت امرك خسنين بيه .
- حسفين : العيال دى عاوزين تهويشة ، عاوزين تهويشة م الللى بالك
 فيها يطلعوا م العزبة جرى . .
- لوانيسدا : اللوقت لو الانجليز عرفت راخ يضرب على طول .

حسنيين : لأنا مش عاوز ضرب ، مش عاوز ضرب فى عرضك
هيكسروا المدينة ، والواد ابنى معاهم • أنا عاوز تهويشة
تهويشة صغيرة يعنى •

القلش : أمور البندا يعنى ، البندا ••

حسنيين : يعنى تعرف أنت ، تهويشة بسيطة يقوم يسيبوا المدينة
عندى ٣ تلاف جنيه عشانك يا لوانيدا ••

لوانيدا : والله دى مسألة مش عارف ، انما نتكلم ••

حسنيين : هنتكلم فى ايه •• بقلك تهويشة ، اتفق مع وليامز ، اتفق
معاه خيلينا نخلص ، من ناحية يبعدوا عنهم وكمان
يبعدوا عن المدينة •

لوانيدا : أنا راح نكلم وليامز حسنيين بيه ، ونشوف الحكاية ••

حسنيين : ٣ تلاف جنيه كاش تحت امرك •

القلش : ويابخت من نفع واستنفع •• (ينظر لزينب) •• أنا نفسى
انفع يا جميل •

زينب : والنبي ما أجملك فى نار جهنم •

لوانيدا : خلاص حسنيين بيه أنا نشوف الحكاية دى ، بعدين نديك
تليفون ••

حسنيين : أيوه ضرب مش عاوز ، تهويشة ، تهويشة صغيرة قوى ،
دول عيال صغيرة ، من أى حاجة يجروا ••

(يدخل اسماعيل ، ثم يتوقف عن الدخول ، ويقف فى
ركن المسرح بحيث يراه المتفرجون ولا يراه الممثلون ثم
يختفى بحركة توحى أنه يختفى لينصت الى حسيديث
حسنيين مع لوانيدا)

لوانيدا : على كل حال اخنا نسوف الحكاية دى ، بس لازم تدفع
الفلوس عشان كابتن وويليامز ، خمس آلاف جنيه كويس •

حسنيين : خمسة كتير قوى يا لوانيدا •

لوانيدا : ماهو عشان ندى زابت ، كمان أسكرى ، بعدين انت أوز
واحد تهويشة ، لازم كله ياخذ •

حسنيين : أنا مستعد أدفع بس هتتفد ازاي •

لوانيدا : ازاي تتفد دى ؟

حسنيين : يعنى راح تعمل ايه •

لوانيدا : راح نخلى ويليامز ياخذ ٢٠ أسكرى ، وبعدين يعمل واخذ هجوم ، ويضرب نار فى الهوا ، ويطردهم م العزبة .
حسنين : عفارم عليك ، بس اوعى يا لوانيدا يحصل حرب .

لوانيدا : دى خسب مخ الزابت ، كمان مخ أسكرى ، كل أسكرى يمسك ٢٠ جنيه ، زابت يمسك ١٠٠ جنيه كله يجى تمام خسنين بيه ، شد خيلك انت .
(ينهض ليتصرف)

القلش : ماهو شديد أهو والحمد لله .. والذنب شديد .
لوانيدا : (ينهض ويتصرف) خمد لله ، خمد لله ..
حسنين : ضرب مش عاوز ، روح معاه يامعلم ، روح معاه فهمه المسائل .

القلش : انا فاهم اللى فى غرضك ، أمور البندا يعنى .. اطمئن ..
(يتصرف القلش أيضا بعد أن يعغم بعينه لزيتب ، وييقى حسنين وحده ، يجرب التليفون ، يدخل اسماعيل ويتجه مباشرة نحو الباب)

حسنين : (ينظر الى اسماعيل بغيظ) يوه الخمارات قفلت ، مافضلش فاتح غير الخمارة بتاع البيت ..
(اسماعيل يصب كأسا لنفسه ولا يرد)

حسنين : أيوه راجع البيت بدرى النهاردة لازم سقعة بره ، والا هو انت بيحوق فيك سقعة ، اللى ماشفتك عيبت مرة ، الا عامل زى الحمار الحساوى ، جبلة ايه دى ، انت معندكش دم .

اسماعيل : لا عندى يا حسنين ، عندى دم كثير .

حسنين : مش باين يعنى ، لو كان عندك دم كنت تفارقنى ..
اسماعيل : اطمئن ، هفارقك ، هفارقك وهفارقها رخرة (ينظر للكاس) دى آخر مرة احطه على لسانى ، تحرم على خمركت وفلوسك وعيشتك اللى زى الهباب ، انا سمعت كل حرف انت قولته ، سمعت الصفقة بينك وبين لوانيدا ، انا خارج ابلغ عنك يا حسنين .

حسنين : هتبلغ مين ، الحكومة ، هه .

اسماعيل : هبلغ الحكومة ، وهبلغ الناس ، وهبلغ طوب الارض ، هاكشفك يا حسنين ، هفضحك ، هفضحك يا حسنين ..
هفضحك .

حسنيين : اسماعيل السكرى بقى راجل ، طيب ماتعمل كده وتفرجنى
عاوز أشموك بتعمل حاجة غير الخدرة اللي انت ناقد نفسك
فيها طول النهار .

اسماعيل : (بتقذف بالكأس فيحطه) هوريك يا حسنين ، أنا اسماعيل
السكرى هوريك ، هوريك .. (ينصرف مترنحا)

حسنيين : ورينى ياخويا ، بس الشطارة ماتورنيش وشك ، الواحد
يكسر وراه ايه ده ، قلة ، ماتنفعش ، يكسر ازازة ويسكى ،
عشان يبقى من بره (ينادى بصوت عال) ياسمرة ، ياسمرة
(يهود اسماعيل الى الحجره بعد لحظه)

حسنيين : الله يعنى رجعت تانى .

اسماعيل : أيوه راجع أقولك حاجة نسيته ، قصدى أقولك ماتناديش
على سمرة ، سميرة مشيت من هنا ، سميرة سمعت الكلام
برضه ، سميرة عند ممدوح من نص ساعة خليك لوحده ..
خليك مع القلش ..
(يدخل القلش فجأة)

القلش : الله بقى ياسماعيل بيه ، انت مش هتفضك بقى من سيرة
القلش دى ، والا يعنى هيه لبانة ، دا كمان مايرضيش
حد الكلام ده .

اسماعيل : أهلا بالمعلم ، انت جيت ، أقعد معاه بقى . خليك جنبه ،
ماهم بيقولوا وراء كل رجل عظيم ، خطاف عظيم برضه
.. لايقين لبعض سلامو عليكو (ينصرف)

حسنيين : (للقلش) أمال انت دخلت هنا ازاي

القلش : دا الباب مفتوح يا حسنين بيه بازقه من غير مؤاخذه راح
مفتوح .

حسنيين : (يعود لتجلوس) ايه اللي حصل ، باب ايه اللي مفتوح .
القلش : مصيبة كبيرة بعيد عنك .

حسنيين : مصيبة ايه ، انت مش فهمته .

القلش : فهمت مين ؟ .

حسنيين : لو انيدا .

القلش : لو انيدا مين وبتاع مين ، هوه لو انيدا ناقص تفهيم ، هو
فاهم كل حاجة .

حسنيين : أمال مصيبة ايه اللي حصلت ؟ .

القلش : المخزن ..

- حسنيين** : مخزن ايه ؟
- القلش** : مخزن السلاح والمواسير *
- حسنيين** : ماله ، الفدائيين سرقوه ؟
- القلش** : فدائيين مين وبتاع مين * الرجالة بتسرعنا اللي سرقوه ،
خدوا نص السلاح وشالوا أغلب المواسير وطفشوا *
- حسنيين** : طفشوا ، طفشوا على فين ؟
- القلش** : الواد برعى القهوجى قاللى انهم خدوا السلاح * وراحو ع
الفسدائيين *
- حسنيين** : والمواسير ؟ برضه ع الفدائيين *
- القلش** : حاجة تمخول يا حسنين بيه دا زمن ايه ده ، المؤمن منصب
بصحيح *
- حسنيين** : (بتنهض) فين مفاتيح المخزن ، فين المفاتيح *
- القلش** : المفاتيح أهم من غير مؤاخذة *
- حسنيين** : طيب تعالى قدامى ، تعالى معايا *
- القلش** : بس هنروح فين من غير مؤاخذة فى السقعة دى **
- حسنيين** : أروح المخزن ، أروح المخزن يامعلم *
- القلش** : وهتشوف ايه فى المخزن ياسعادة البيه ، ماهو زى مبقولك
أنا كده *
- حسنيين** : اتفضل قدامى ، قدامى **
- (ينصرف وخلفه القلش * يبقى المسرح خاليا لحظة ثم
يدخل اسماعيل ويتجه نحو البار مباشرة ، وبعد أن
يصب لنفسه كأسا ويشربه وهو يلهث ، يحدث نفسه)
- اسماعيل** : آل رايح ابلغ آل ، كنت رايح المحافظة ، ماقدرتش . مش
شايب أمشى ، أنا سكرى بصحيح ، سكرى ، أنا انتهيت من
زمان ، خلصت ، أنا خلصت ، ١٥ سنة سجن عشان وطنى ،
عشان بلدى ، ١٥ سنة سجن ، و ٢٠ سنة خمسة ،
(يلقى برأسه فوق البار ويكي ثم يرفع رأسه مرة
اخرى ويشرب كأسا) ايه كنت عاوز أروح احكيلهم ،
احكيلهم ع المواسير ، والناس اللي يتموت عشان يوكلو
عيالهم ، ولوانيدا ، والرئيس سعد الله ، والقلش ، ومخزن
السلاح ، والتهریب ، كنت عاوز أحكى كثير * انما دا

حتى الكلام عاوز شجاعة ، الكلام عاوز شجاعة ، الشجاعة
ماتت ، ماتت من زمان ..

(يدخل المسرح نسر الفراش في بنطلون وجاكete عسكري
طيران في الجيش الإنجليزي ، يصب اسماعيل كاسا
في جوفه ، ثم يفتح عينيه جيدا فيشاهد نسر)

نسر : انت لسه برضه ياسماعيل بيه ..

اسماعيل : الله ، دا مين ، انت بقيت طيران يا واد ، نسر طار بصحيح
والله فيك خير لسه يا واد .

نسر : طيران ايه وبتاع ايه ياسماعيل بيه ، البلد بتتحرق بره ،
وانت لسه قاعد تسكر !

اسماعيل : بلد ايه يا واد اللي بتتحرق ، بلد مين .

نسر : المدينة يا اسماعيل بيه ، المدينة انحرفت ، النار للجو بره
وانت ولا هنا ..

اسماعيل : مدينة مين يا واد اللي انحرفت .

نسر : المدينة ، عزبة بنايوتى ..

اسماعيل : والولاد .. والولاد جرالهم ايه ؟

نسر : حد عارف يا اسماعيل بيه ، هو اللي مات مات ، واللى
انجرح انجرح ، الدم بقى للركب بره يا اسماعيل بيه ،
هو حسنين بيه فين آمال ؟

اسماعيل : حسنين بيه (يضحك بهستيرية) حسنين بيه في المخزن ، في
المواسير ، المواسير هناك للركب ، وممدوح يا واد ..

نسر : ممدوح كان في المعركة ، كان زى الأسد يا اسماعيل بيه ،
تمام زى الأسد ..

اسماعيل : (ينفث) طالع لعمة يا واد ، اسمع ، اسمع يا نسر ، اللي
بلغ عنكو حسنين بيه .

نسر : ماتقولش كده آمال يا اسماعيل بيه .

اسماعيل : آل ماتقولش كده آل ، بقولك سامعه بودنى دى ، سامعه
بودنى ، وخرجت من شوية رحت أبلغ عنه ، عميت ،
ماقدرتش امشى ، وعطشت ، زورى نشف ، كنت عاوز
كاس خمره بأى ثمن ، ويمكن لو لقيت ساعتها كنت رحت
على طول .. لكن ياخسارة مالقيتش ، يا خسارة ..
ياخسارة يا نسر .. (بيكى)

نسر : أنت بتعيط يا اسماعيل بيه !

اسماعيل : أنا مش اسماعيل بيه ياواد ، أنا جئة من زمان ، أنا ميت ، أنا ميت بيه ، اسمع تعالى معايا ، تعالى معايا على بره .

نسر : وهنروح فين بس ؟

اسماعيل : أشوف النار ، أشوف الولاد ، أشوفهم ، نفسى أشوفهم .
(يجذب نسر ويخرجان ، قبل أن يخرج يعثر على مفاتيح
حسنين بيه ملقاة على الأرض)

اسماعيل : دى مفاتيح حسنين ، مفاتيح الكنوز ، مفاتيح المخزن .

نسر : مخزن ايه ، هوه فاضل حاجة فى المخزن ، الرجالة بتوعه
شالو السلاح وجم ع المدينة .

اسماعيل : رجالة مين ؟

نسر : رجالة القلش ، كل واحد خد سلاحه وجه ع المدينة .

اسماعيل : جه يعمل ايه ، يقلعوا مواسيرها رخره .

نسر : مواسير ايه يا اسماعيل بيه ، دول همه اللى انقذونا ، لو
كانش جم رجالة القلش دول كنا ضعنا كلنا ، همه
اللى لبخو الانجليز وفكو الحصار عنا .

اسماعيل : رجالة القلش !

نسر : أيوه رجالة القلش بس هو ماكانش فيهم .

اسماعيل : لا وهوه كان فيهم من امتى دا حتى المواسير ماهوش فيهم
الرجالة كانت تروح تموت وهوه قاعد ع القهوة يشرب
شيشة .

نسر : منظرهم كان مفرح يا اسماعيل بيه ساعة ما هجموا عليهم ،
عيال زى العفاريت الزرق ياكلو الحجر .

اسماعيل : عارفهم ، منتقوللى ، دا الانجليز ماخافتش م الألمان ، وكانت
تخاف منهم ، فرحتنى يا نسر ، فرحتنى . . . الدنيسا
لسه بخير يا نسر .

نسر : آمال يا اسماعيل بيه .

اسماعيل : اسدنى يا نسر بيه وياالملا بينا .

(يخرجان ويرتفع صوت حسنين والقلش فى الخلفية
ثم يدخل المسرح)

حسنيين : على انا الكلام ده ، دانا حسنين يامعلم ، انا اللي خبزك
وعجنك ، انا اللي مربيك يامعلم .
القلش : الله الله ، احنا هنتفتق لبعض والا ايه .

حسنيين : رجالة مين دول ياخويا اللي بقوا فدائيين على آخر !لزمين .
رجالتك يا معلم ، نسر ، زقلط ، والمولى ، ودياب وابو
مزيكة دول بقوا فدائية ، خدوا السلاح وبقوا فدائية ،
طيب والمواسير ، والمواسير راحت فين يامعلم .

القلش : خدوها بحقهم .

حسنيين : حقهم دا ايه .

القلش : حقهم ، عرقهم وشقامهم .

حسنيين : كمان انت هتسرقنى يا معلم ، هتسرق حسنيين .

القلش : الله الله ، الا حكاية السرقة دى ، انا واللى خلقك اضيع
عمرى فى كلمة زى دى ، انا راجل شريف .

حسنيين : شريف ، من امتى حكاية شريف دى .

القلش : طول عمرى ، انا حرامى آى نعم ، انما حرامى شريف ،
حرامى انجليز يعنى ، مابحطش ايدى فى جيب حد ، ويعرض
نفسى للموت واكل لقمة عيشى ، باحارب اعداى ، انما
اموالهم ومواسيرهم غنايم لكم ، الا حرامى دى .

حسنيين : امال اللي يسرق المواسير والسلاح م المخزن يبقى ايه .

القلش : بقولك ماسرقتش حاجة .

حسنيين : (وهو يرفع سماعة التليفون) طيب انا هاوريك يا معلم ،
هاوريك يا حرامى .

القلش : بقولك بلاش كلمة حرامى دى ، الا حرامى ، امال انت ايه ،
نيابة ، مانت حرامى زيبى .

حسنيين : انا حرامى يا قليل الأدب .

القلش : أجدع حرامى ، ايه يعنى ، حرامى ببدة ، حرامى غنى ،
ولا تسخروا من ناس هم خير منكم .

حسنيين : على الكلام ده انا ، على انا يا قلش ، يا شريف (يتكلم)
فى التليفون) آلو . . ادينى الحكمدار .

القلش : طيب بلغ ، بلغ وانا اقول كل حاجة ، وشهد شاهد من اهلها ،
ثم ايه يعنى الحكايات ، على الطلاق لا رايح للفدائيين انا

حر . ومن بس كده ، على الطلاق لأقول كل حاجة ، هيه
حف الحكاية . والا ايه .

(يهرع القلش الى الخارج ، يصطدم بنسى واسماعيل
يحملان جريحا)

القلش : دا ايه ده ٩٠٠

اسماعيل : ماسورة ، مش شايف ايه ده .٠٠ راجل جريح .٠٠

القلش : اوتومييل دهسه .٠٠

اسماعيل : لأ الانجليز دهسوه ، الانجليز بتوعك انت ولوانيدا وحسنين
بييه .

حسنيين : (تقع من يده سماعة التليفون) ايه ده ، مين ده .٠٠

اسماعيل : دى العيال أم قصة يا حسنين . شايف القصة منعاصة دم
ازاى .٠٠

حسنيين : ايه اللى حصل .٠٠

اسماعيل : دا التهويشة مانفتش .٠٠ الانجليز ضربوا فى المليان .٠٠
كسروا المدينة (يضحك بهستيرية) هات الخريطة ألف فيها
ازازه يا حسنيين .

حسنيين : المدينة . المدينة .

اسماعيل : ايوه المدينة ، افتح الشباك تشوف النار بعينك .

حسنيين : (يجرى ويفتح النافذة يشاهد السدّة الملهب) النار ، النار ،
احنا انتهينا ، انتهينا .٠٠

اسماعيل : اللى انتهى عزبتك بس ، فلوسك حياتك نفسها انتهت
يا حسنيين .

حسنيين : الخراب ، الخراب .

اسماعيل : دا مش خراب ، دا عمار ، النار بتاكل القديم ، عشان
تبنى جديد غيره ، شايف النار كويس يا حسنيين .

حسنيين : النار ، النار ، النار .٠٠

اسماعيل : شايفها كويس ، أهو أنا شايف فى نورها عالم تانى طلوع
بيزحف ، جيل زى الورد هتسويه النار دى ، دنيا جديدة
قايمة يا حسنيين ، لا بتعتك ولا بتعتى .٠٠ دنيا تانية يا حسنيين
ثورة ، ثورة بحق وحقيقى ، ثورة تنصف ، تجيب عاليها
فى واطيها ، دى بداية ، دى بداية .٠٠

القلش : يا قوة الله ، دا الخمرة بتوسع المخ بصحيح *
حسنيين : (بتهادى على كرسى والسنة النار تمتد فى الفضاء البعيد)
ممدوح .. ممدوح ..

اسماعيل : مالك ومال ممدوح ، ممدوح راح لحاله ، ممدوح مع رجاته
فى الجبل * ياللا بينا يا نسر (ينظر نحو الجريح) ماتخافش
عشر دقائق والاسعاف هتيجى تشيك (بنظرة نحو حسنين)
من حق مفاتيحك أهه ، المخزن فضى * السلاح وزعناه ،
هناك شوية مواسير يمكن ينفعوك يا حسنين ، ياللا بينا
يا نسر . (ينظر لحسنيين) خليك مع القلش *

القلش : الله ، رايعين فين ، خدونى معاكو ، دانا احارب زى الجن
واللى خلقتك *
(يدخل بنايوتى فجأة)

بنايوتى : أنا جيت فى المعاد مطبوط حسنين بيه ، أنا وخياة دينى
مش ممكن يستنى بعد كده *

القلش : غفارم عليك ، خليك معاد انت بقى *
اسماعيل : اسندنى يا واد يا نسر ، اسندنى ياواد أما أروح احارب
(فى خطوات عسكرية) شمال ، يمين ، شمال * (يلتفت
نحو القلش) انت رايع فين يا ضلالى ، اوعى تمشى فى
سكتنا أحسن وحية ممدوح أكسر رجلك *

القلش : وهتكسر رجلى على ايه ، ماتروح فى داهية (بصوت عال)
بت يا زينب .. يا زينب ..

زينب : (تظهر بسرعة) أيوه ياقلوشتى *

القلش : ياللا بينا يا بت *

زينب : استنا أما اجيب حاجتى *

القلش : ماتجببش حاجة ياللا بينا *

(يشدها من ذراعها ، ويهرعان الى الخارج)

(يخرج اسماعيل ونسر فى حركات عسكرية وبنايوتى
يتفرج عليهم فى دهشة ، والنار تتصاعد من بعيد من
خلال النافذة المفتوحة ، وحسنيين يترنج على المسرح وهو
يصيح)

حسنيين : على فين يا اسماعيل ، على فين ، المدينة ، المدينة ، النار ،
النار .

(بنايوتى يتحنى على حسنين وهو يسقط على الأرض
مطالباً إياه بثمن العزبة) .

(سستار)